

Si furat brumâ Lechicis timendus  
 Jupiter arvis,  
 Cum per hybernas grauior pruinas  
 Frigidum cyclus revehet Decembrem ,  
 Me rudi lanâ spoliatus olim  
 Induet agnus.

AD

POTENTISSIMAS  
 EUROPÆ GENTES.

De recuperando Orientis Imperio.

O D E L.

SI nec minorum spernis idonea  
 Mandata vatum ; duc age Pegason ,  
 Sertisque frænatumque lauris,  
 Aonio DE A nota colli.

Ibo, ibo vastis quâ patet atriis  
 Erraticorum patria fiderum ;  
 Ibo per obstantes coluros ,

Qua solidi geniale solis.

Lucescit aurum ; quâ vaga Cynthia  
 Argenteorum lumine cornuum  
 Præit residentes Planetas ;

Quâ nimio polus ardet igni.

Ibo viator ; me nec inhospitus  
 Terrebit axis ; me nec Olympicæ  
 Ursæque, Taurique, & superbus  
 Marmorico Leo sistet ungue.

Me fessus Atlas, me celer Hesperus,  
 Postquam propinquo jungere Phosphoro  
 Et noctis auctores & ortus

Iussit equos, rutilante curru.

F 2

Vehet

Vehet per alti devia climatis,  
 Camposque cæli. Jam mihi patrius,  
 Jam pene decrevisse mundus,  
 Jam minimæ periisse turres,  
 Orbisque punctum vilius aspici;  
 Et conceitatis testa vaporibus  
 Deyexa sensim non videri  
 Incipiunt, vacuoque gentes  
 Hiant inani. Jam mihi sidera,  
 Auro repexis vecta jugalibus,  
 Hinc inde certatim serenis  
 In numerum crepuère flammis.  
 Illinc Bootes, hinc gravibus rigens  
 Armis Orion, cominus obvios  
 Currus salutare, & canori  
 Eloquium geminare plectri  
 Gratantur ultro. Jam mihi, quæ propè  
 Æquata binis sæcula lancibus  
 Dispensat, effetoque mensès  
 Virgo suis glomerat catenis.  
 Hinc Isis, illinc Triptolemo comes  
 Jason, reductis nubila brachiis  
 Stipant, peregrinumque vatem  
 Sidereo recreant sereno.  
 Hic me, sed ehèu! quam lacrymabili  
 Salutat auro Cynthius. hèu dolor!  
 Inquit, Corallorum pudendis  
 Mancipium prope, Phæbus, armis,  
 Tot jam recentes præcipito dies,  
 Tot subjugatâ luce meridiem  
 Adverto; nec quisquam nefasta  
 Audet adhuc minuisse vincla.  
 Nunquamne primo mane serenior,  
 Et nec dum adultis mitior ignibus,  
 Videbo surgentes Polonos,  
 Cum patriis solidantur armis,  
 Et Martiales fortibus induunt  
 Lycas lacertis: non tibi Battave,  
 Vastum-



Vastumque qui potatis Humbrum,  
 Et trepidi vaga stagna Trentæ  
 Hauritis Angli, non tibi nascitur  
 In subre Phæbus? sic ne Othomanidis,  
 Torvoque captivus Gelono  
 Perpetuo famulabor ortu?  
 Sic fatus alto non sine murmure  
 Largo madenti flumine lividas  
 Immerfit in fletu querelas,  
 Et rubeo pudefactus ostro,  
 Me sub paternis, nescio quomodo,  
 Reliquit astris. hîc ubi tetricis  
 Despumat Arcturus procellis;  
 Et gelidas male tractat Urfas,  
 Hîc qua Polonis Vistula vitreas  
 Propinat undas; quâ celeres fugæ  
 Isterque lubricusque Varta,  
 Sarmaticæ lavat arva terræ.  
 Hinc vos canoro carmine, posteri,  
 Compello vates; hinc lacrymabiles  
 Phæbique & astrorum querelas  
 Pterio meditabor auro.  
 Tantumne nobis occidit, & suum  
 Abscondit ortum Phæbus? an aureos  
 Ignava non meretur ignes  
 Posteritas, radiumque Phæbi?  
 Senesne tantum, nec vegetos dies  
 Serum recedens mane sub Hesperum  
 Illuminabit, & fatigato  
 Occiduum feriet fenestram  
 Aurora curru? Surgite Martiæ  
 Manus; feroces surgite posteri;  
 Diesque nascentemque solem  
 In proprium, repente ferro,  
 Cogatis orbem. Surgite Sarmatæ,  
 Mavortiarum lumina gentium;  
 Vobis Gelonorum nefasto  
 Erubuit toties pudore

Aurora Mater. vos refugus Geres,  
 Canæque sensit bruma Propontidis.  
 Vos Moschus, audacesque Bessi,  
 Vos Scythicæ pavet ora terræ.  
 An jam mucrones & gladii minas  
 Torpor remisso cretus in otio  
 Recudit in falces? & hastas  
 Connubii socius pudendi  
 Jussit maritis nubere viribus,  
 Fædoque Bacchi Martia spicula  
 Gravavit amplexu, nec ipsum  
 Esse sinens sine prole telum.  
 Nec dum ne nostris montibus erutus  
 Chalybs severi cuspidis arduas  
 Promittit iras? hêu! nec ullo  
 Æs galeas coquit in camino?  
 Nondum remotum natus ad Aufidum  
 Faber futuros cudit acinaces?  
 Quêis torva Turcarum procella  
 Trans geminum redigatur orbem  
 Metasque terræ: queis Othomanidum  
 Asserta nostris Cynthia legibus  
 Utrumque reclinasse cornu,  
 Et domino spoliasse crines  
 Cogatur auro: queis tibi Vistula  
 Jungamus Hebrum, Baëtraque patrio  
 Addamus Istro: Carpathoque  
 Et comites Heliconis artes,  
 Et te Latinis non inimicior  
 Parnasse Musis; queis juga Phocidos  
 Ortumque & Auroræ pudorem  
 Sarmaticis sociemus astris?  
 Surgetis? ehêu! Surgite posteri.  
 Molles virili rumpite classico  
 Somnosque torpentisque dextras,  
 Et viduum sine laude Martem.



## A D E A S D E M

Mutuis inter se armis collifas.

## O D E L I.

**A**T non vel enses, vel clypei vacant,  
 Quos in suorum sanguine civium  
 Infana demersit libido;  
 Eque suis capita alta membris  
 Totum cruorem fundere prodigo  
 Persuasit amni. Scilicet aureis  
 Caput coronatum micabit  
 In radiis, teretique gemmâ,  
 Si membra fusô debita sanguine  
 Tributa fundant. non bene Regio  
 Offusa fulgebit sereno  
 Cafaries, quoties cruentus  
 E subditorum vulnere sumitur  
 Daturque census. ut malè corrui  
 Exangue sterniturque corpus;  
 Sic proprio viduata cive  
 Regum potestas. Parcite Principes,  
 Inominatis parcite cædibus;  
 Lapsisque parciore ferro  
 Excidium prohibete regnis.  
 Vivone, quod non crediderim, piget  
 Præesse vulgo? num morientibus  
 Regnare nec quidquam pudebit  
 Civibus, in tumultisque latas  
 Scripsisse leges? sistite prò dolor!  
 Et Christiano parcite sanguini.  
 Cur vestra; prò pudor! severos  
 In gladios abiçre sceptra.  
 Jam pene rauco parcite classico.  
 Nam qui tyrannis imperat ensibus,

Rarò cruentatis retenta  
 Regna diu moderatur armis.  
 Mersæ frequenti funere, pæneque  
 In se ruenti parcite Principes  
 Naturæ, & in vestris sepultum  
 Visceribus removete ferrum.  
 Vel si cruenti tantus amor viget  
 Ferri, & furoris protinus arduum  
 Inflate cornu: non vetabo  
 Odrysiæ sepelire turmas  
 Et in suorum funere civium.  
 Non arma Thracum protinus in suo  
 Fixisse tabo, non furores,  
 Non rigidum prohibebo ferrum,  
 Non arma, Reges. dum modò mutuis  
 Pax fascinato territa classico  
 Conspiret armis, & fideles  
 Unanimi gravet ære dextras.  
 Saltem remoti in vortice Bosphori  
 Navifragantum lintea navium  
 Mergantur, audacesque peltæ  
 Sithoniis vireant sagittis.  
 Non parcus iræ, non ego Martiam  
 Vetabo pubem Barbaricis manus  
 Inferre signis; non Gelonis  
 Vulneribus gravius libratum  
 Mersisse telum: non juvenilia  
 In præliantium pectore Bistonum  
 Arma experiri, & auspiciatum  
 Cædibus exacuisse ferrum.  
 Horrete telis, tympana tundite,  
 Armate classes tela refundite,  
 Exercitamque in severum  
 Martis opus glomerate pubem.  
 Non arma vestris, non frameas ego  
 Extrudo dextris, non solido latus  
 Exarmo ferro; sed nec ipsos  
 In dubium revoco furores,



Bellique causas, hoc precor unicum,  
Vobis propinqui parcite Principes.

Vobis & arma & militares

Ferte manus, meliusque vestrum

Locate robur. Si tituli placent,

Et causa belli, nomina, si cruor,

urbesque, Regnorumque census;

Fertilius titulisque Regnum.

Censuque vestris finibus imminet.

Nostriſque quondam rapta parentibus

Throphæa verſat, ampliōres

Hic titulos ſibi quiſque quærat.

Hic ſubjugatæ rector Achæiæ;

Albinianis ille vocabitur

Primasque Regnatorque terræ

A populis, famuloſque ſceptro

Reget Pelagoſos. hic Macedonici

Magnique fines occupet imperiſ.

Hic Bactra, Locrorumque cenſum, &

Æmatium capiti addat aurum.

Hic Doris, illi ſolvat Alanicum

Tributa vulgus. hinc ebur Atticum

Phocisſque, Delphoſque, & Methone,

Perpetuò famuletur Iſthmo.

Hic Lambianis, ille Corinthiis

Regnabit heros; juraque Beſbico

Incidet in ſaxis colono,

Memphiticis animata cælis.

Hic Seſtianos; hic moderabitur,

Multo natantes æquore Cycladas,

Paronque, Naxumque, & Coronen,

Et Scythici nova luſtra Neſſi.

Minuſne laudis quiſque putaverit,

Superbientis cornua Thraciæ,

Arceſque Bizanti, & probroſi

Mænia diripuiffè Daci,

Quam ſubditorum ſanguine ſordidos,

Inter procellæ fulmina civica,

Ensesque, cognatasque dextras,  
 Et patriam maduisse terram?  
 Tandem cruentas jungite dexteras,  
 Tandem labanti parcite Patriæ,  
 Mundóque; conjunctisque Turcam  
 Viribus aggrediamur hostem.  
 Nondumne partis non sine laureis  
 Junctas perenni fœdere dexteras,  
 Nondumne complicasse signa  
 Austriacis rutilam tenebris  
 Fumóque belli cernimus alitem?  
 Nondum nefastæ prò dolor! ærea,  
 Pugnæque, concordisque Martis  
 Bistonio seges horret agro?  
 Nondumne mistim cerno micantia  
 Horrere multo LILIA milite?  
 Nondum Leones & nitentem  
 Sarmaticis AQUILAM maniplis?  
 Nondum propinquus desipuit cruor?  
 Nec pro Garumnæ flumine Peneum,  
 Hebrúnque pro Rheno, & remotum  
 Haurit eques galeis Tibiscum?

In diei cujusdam diluculo

AD

## VIRGINEM MATREM,

Auroram suam.

O D E LII.

**J**Am rariores excubant cælo faces.  
 Jam lassâ nictant sidera,  
 Sacérque Marti gallus è somno excitæ  
 Salutat auroræ jubar:

Et



Et Martiali classicum cantu ciens  
 Soli futuro præcinit.  
 Surgamus! O quæ SOLIS Æterni PARENS  
 AURORA Virgo diceris.  
 Musis amicum sidus exorere meis,  
 Natumque collustra diem.  
 Tuo futura surgat in sinu dies,  
 Et vesper expiret senex,  
 Surgamus, & ter Virgini sacratum AVE,  
 Bonamque dicamus diem.

AD

# FRANCISCUM RUBIUM.

Temporis pretium commendat.

## O D E L I I I .

**I**Mò tunc etiam, Rubi,  
 Cum vitam trahimus, perdimus, & leves  
 Parcarum terimus colos,  
 Lassamusque citi stamina sæculi.  
 Quâ quisque est genitus die,  
 Illâ mortis iter cæpit, & arduam  
 Leti currere semitam  
 Æternum fugiunt sæcula; quælibet  
 Fato sit propior dies.  
 Et quidquid puero temporis additur;  
 Vitæ detrahitur sive.  
 Sed (proh!) quis pretium temporis æstimat?  
 Quis lapsos numerat dies;  
 Annorumque fugam? quis morientium  
 Inter funera mensium,  
 Vitæ rupta suæ licia computat?

Hic

Hic vanos sequitur Notos :

Hic fumosa suæ nubila gloriae.

Hic labentia syderum

Rimatus dubio examina lumine,

Cælis imminet omnibus,

At sese interea negligit, & sua.

Hic, quò plura recentibus

Gazis accumularet, se minuit; neque

Scit quòd fiat egentior,

Dum sese ipse caret. Quid memorem, quibus

Dum quærentur opes, ruunt

Perdunturque animi? Pluribus, hêu dolor!

Nec nati pereunt dies.

Sic dum perpetuis mentibus obvii

Æternas terimus moras;

Urgent prona suum Fata negotium.

## A D A M I C U M.

Se esse quiete suâ contentum.

### O D E LIV.

**M**E teste quidvis & facere & pati  
Avebo, vates, non mihi consono

Aut circus applaudat tumultu,

Aut resonum faveat theatrum.

Secretus omni plebis ab agmine,

Inter quieti claustra silentii

Somnumque curarum latebo,

Nec nimis dabo vela votis

Securus ævi. Non ego publica

Admurmurantium vota sodalium

Vovebo; sat capax theatrum

Ipsè mihi, mihi testis ipse.



# FERREA JASONIS POSTERITAS

E Tot intestinis diversarum gentium  
bellis recensita.

## O D E LV.

SÆpè de jactis animata saxis  
Sentheatarum soboles petrarum,  
Sæpè narramur lapidosa prisæ

Pignora Pyrrhæ.

Namque dum, totâ pereunte terra,  
Unicum mersus foret æquor Orbis.  
Cuncta dum magnus fierent novarum

Campus aquarum;

Fertur in parvi trabe clausa lintris  
Per sepultarum superas natasse  
Turrium pinnas sociata sancto

Pyrrha marito.

Tunc per excelsos nemorum recessus  
Hinc & hinc sparsæ jacuère Phocæ.  
Tunc Theris lætos stupuit sub alto

Æquore campos.

Hic suos alter sinuasse remos,  
Et repentinas agitasse cymbas  
Dicitur, curvis ubi nuper arva

Torsit aratris.

Nulla frænatum cohibere Pontum  
Ripa dimotis poterat fluentis,  
Nulla dispersos poterant domasse

Littora fluctus.

Hic, ubi celsis propior Planetis  
Hæmus assurgit, madido procellæ

Hæserant limo, veterique major  
Nereus alveô,

At simul toto fugiente Ponto,  
Ac in antiquas remeante ripas,  
Fertur in primos iterum redisse

Orbita vultus:  
Et simul docti soboles Promethei  
In super stantis bifido steterisse  
Colle Parnassi, sacra naufragi com-  
pendia mundi.

Ne tamen merso viduata cive  
Terra squaleret; Themis imperârat  
Projici post se graviora magna  
Ossa parentis,

Sic in humanos recreata vultus  
Saxa surgebant; simul hinc maritos.  
Vir jacit; jactat simul hinc marita  
Pyrrha maritas.

Nec pari cunctos genuisse saxo  
Juverat: paucos melius positum  
Marmor effudit, variisque picta  
Fragmina venis,

Hunc filix, illum popularis orbi  
Petra donavit: pretiosiore  
Neminem fama est tamen excitatum  
Esse lapillo.

Nullus offensus adamante venis,  
Aut coruscanti fatus è Berillo  
Nullus è gemmis, solidòque vitam  
Traxit ab auro.

Quin licet plebem rude, nobilesque  
Cultius saxum tulit; his & illis  
Dura nativo riguisse narrant  
Pectora saxo.

Nos tamen (si quæ veterum probata  
Stat fides vatum) propè duriore  
Dixerim ferro genitos, vel arcti  
Aere metalli.



Nos Chalybs, vel si magis esse quidquam  
 Creditur durum, male pertinaci  
 Induit vitâ; rigidisque strinxit  
 Pectora fibris.

Hinc amans ferri chalybumque proles,  
 Et tot infensis agitata castris;  
 Ferreos ipsis gladius, & hastis  
 Prodimus ortus.

Quin & illorum seges esse dentium,  
 Quos venenati sanie draconis  
 Ritè perfusus Minyos Jâson  
 Sparfit in agros

Jure credemur; quoties scelestâ  
 Arma civili glomeramus ære.  
 Et reluctantes terimus propinquis  
 Cædibus enses.

Jamque per terras, juga, stagna, montes,  
 Quæritur letum, residetque Parca;  
 Jamque pacato pudor est quietum oc-  
 cumbere fato.

Hic propinatham, reboante Ponto,  
 Cum mari mortem bibit; hic cruentos  
 Emovit fluctus, proprioque mistam  
 Sanguine lympham.

Alter ereptis viduatus armis  
 Propriâ Martem renovat ruinâ.  
 Et dolet, si non comes hostis atrum  
 Scandat ad orcum.

O nimis laxis saturæ ruinis  
 Impium gentes cohibere ferrum.  
 Ne vetustorum maneat fidelis  
 Fabula vatam.

Non exile damnum esse inconsultam  
donationem.

O D E LVI.

**D**Onum qui malè collocat,  
Urget magna novo damna negotio.  
Frustra spargitis aurea  
Reges munificis munera dexteris.  
Non dat, sed sua projicit  
Inconsulta manus. qui temerè ferit  
Latas semen in areas,  
Parcâ messe suis prospicit horreis.  
At qui quærit idonea  
Mandandæ segeti jugera, largior  
Hunc circum virujt Ceres,  
Centenoque operam fânore sarcit.  
Sic nos cum damus obviis,  
Ingratos facimus; nostraque prodigè  
Dando, munera perdimus.  
Felix qui geminâ lance beatior  
Æquavit meritis manum.  
Libratamque pari munere gratiam.

AD

VIRGINEM MATREM.

Cynthiam suam.

In cujusdam diei crepusculo.

O D E LVII.

**E**N per supremos deciduæ tholos  
Horæ reclinem præcipitant diem!

Tibi-



Tibique, Virgo, jam se anhele  
 Prona dies senio, & supinis  
 Inclinat umbris. Pande fidelius,  
 Tuo beatos pondere cardines:  
 Stellasque, supremumque noctis  
 Imperium, vigilesque cæli  
 Impelle flammæ. Si tibi gemmeo  
 Offusa surgunt cornua lumine;  
 Si casta non frustra vocari  
 LUNA cupis, teneroque frontem  
 Accendis argento. O nive purior!  
 O innocenti candidior rosâ,  
 Permite defessum parumper  
 Teste polo accubuisse vatem!  
 Permite blando sparsa papavere  
 (Quamquam molestæ cura veter chelys)  
 Et membra, projectumque corpus  
 Hocce super jacuisse strato.

AD

## THOMAM NAQUINIUM.

Melius illum sapere, qui in herba  
 medetur vitiis.

## O D E LVIII.

**C**Rescit dum pateris scelus,  
 Fæcundoque caput tollit in otio  
 Impunita protervia.  
 Tunc, cum purpureis halat ager rosis,  
 Palantesque rubentibus  
 Inserpunt violæ per sata brachiis,  
 Non piger patiens manus  
 Herbas dissimulet falx; juveni feroc

G

Non

Non parcat ligo carduo.

In primo facilis flore pati manum  
Paulatim gravius ferit;

Vellentemque sequi pænè manum nequit  
Annorum numero senex.

Nil est ira sibi quod vetitum putet,  
Provectusque furor. magis

Maturum feriet, si pateris, nefas.

AD

MARIANUM ANNEUM.

O D E L I X.

**D**ixeras nuper; melius perorat,  
Qui per exemplum solidasque praxes  
Verba supplevit; loquiturque vivos  
Vota per actus.

Dixeras, quin nec caruere nostro  
Verba consensu, meliora mutus,  
Suadet Orator: superat loquacem  
Dextera linguam.

Attamen cano pereunte mundo,  
Rarus exemplis, solidæque praxi  
Æmulus paret. caret illa primo  
Robore virtus.

Sic licet primos Oriens nitores  
Æthiops natæ videat diei:  
Atra nocturno tamen ipsè fuscet  
Membra colore.

Quin nec Ascreæ patiens Camanæ  
Temnit inflexum piger orbis auruna.  
Nec lyre, nugis satur, obsequentem ac-  
commodat aurem.

Et licèt quondam lapides canendo  
Traxit Amphion; tamen ipsa multis

Displi-



Displicet morum chelys, & severi  
 Testis honesti.  
 Jamque mordaces Satyros vocamus,  
 Si quis audaci memorat vetustam  
 Voce virtutem, cytharæque primos  
 Suggestit annos.  
 Fallimur? quidquid stabilis priorum  
 Gesserat virtus, male feriatam  
 Damnat ætatem, sterileque laudum  
 Exprobrat annos.

AD

FAMIANUM ARANDAM  
 FRAGMENTUM  
 POLITICUM.

De Liberalitate Principis.

O D E LX.

**A**T nec tributum pendere nescius,  
 Se subditorum munere Regio  
 Audire VECTIGALEM ayebit  
 Munificus, Famiane, Princeps,  
 Non ille frontem contrahit ad sui  
 Petita vulgi. non popularium  
 Surdus querelarum molesto  
 Accumulat sua lucra censu.  
 Et illa tantum computat, ac suæ  
 Importat arcæ, quæ tenues opum  
 Effundit in cives; suarum  
 Largus opum, & sibi pauper uni.  
 Sint plura quæ dat, quam capit, indigo  
 Illata fisco. Non ego nundinas,

G 2

TUR

Turpemque mercatum probabo  
 Si cupidus sua dona Princeps,  
 Decusque magni nominis aureâ  
 In lance librat: Si meritis datum  
 Præponit aurum; vel repensum  
 Æs gladio frameisque nummos,  
 Ille ille, magnis dignior asseri,  
 Quem larga plenis copia cornibus,  
 Pronæque liberalitatis  
 Egregiæ comitantur artes,  
 Et non coactis munera passibus.  
 Ultroque dandum quod petitur, cui  
 Anhela prævenisse vota, &  
 Munificum libet esse gratis:  
 Magnetis aurum si subeat vices  
 Traherentur enses. fortior est manus  
 Onusta donis. nemo Thraces  
 Non feriet, modo NERVUS adfit.  
 Quin & retuso jam senio putres  
 Serenioris cote pecuniæ  
 Limantur enses. sic virorum  
 Et meritorum opulentus emptor  
 Antiqua Princeps secula prorogat;  
 Sic pæne ab ipsis Manibus Hectoras,  
 Codrosque, Mutiosque & altis  
 Scipiadas revocans ab umbris,  
 Depræliantum nobile Jasonum  
 Instaurat ævum. non pudet Herculem,  
 Novosque sub signis Achilles  
 Munifici meruisse Martis.



## PÆAN LECHICVS

An. Dn, 1645.

Invictissimo Poloniæ &amp; Sueciæ

REGI

VLADISLAO QUARTO.

O D E L X I.

JAM mihi multis revoluta chartis  
 Crescit in plenam Lechias staturam;  
 Jam Marianis redimita vernant  
 Tempora fertis.

Ite vulgares procul, Ite plausus,  
 Ite plebeix monumenta famæ.  
 Ite, nil restat populare tensis

Dicere nervis.

Te, Sub-Arctoi Moderator Orbis,  
 Te per Aſcræ traho fila buxi,  
 Te renidenti tremulum loquetur

Barbiton auro

Ipsè devotis tibi servit armis;  
 Rauca dum raras tuba scindit auras,  
 Præses armorum; tibi fæderatus  
 Militat æther.

Hinc tibi magnas dicat unda puppes;  
 Hinc laceſſitis tremit æthra contis;  
 Inde torrentes pudor undat alto

Sanguine campos.

Hinc tibi strati poplitis minores  
 Supplicant Moschi; trepidique Thraces  
 Indè; decreſcunt Dacicæ caducis  
 Mænibus urbes.

G 3

Tu

Tu diu castæ Cereri negatos  
 Vindicas campos, foliisque Bacchuræ  
 Induis, cæfas viridi coronans  
 Palmite filvas.

Te sibi sero moriente Phæbo,  
 Te sub Eois oriente tonsis,  
 Læta rumorum loquitur fideli  
 Voce iuventus.

Te canunt mistæ pueris puellæ;  
 Te docent parvos geminare natos  
 Sedulæ matres, quoties renatus  
 Nascitur ortus.

Hic ubi pigris taciturna ripis  
 Mortui campos lavat unda Ponti;  
 Hic ubi plenus nimis Phaneta  
 Æstuat horis;

Te coronatis Cythosura bigis  
 Per triumphati vehet arva cæli;  
 Te per ignitum jubar, & pudicas  
 Memnonis arces.

Te fatigatus pharetrâ Gelonus  
 Audiet fractis levior sagittis.  
 Ter tibi pronâ Cydari severas  
 Exuet iras.

Ibis in nostris per inane pentis  
 Nubiurn victor, dominusque cæli.  
 Ibis emotas spatiat inter  
 Ætheris arces.

Nescit in parvis latitare terris  
 Arduo virtus stabilita nisu.  
 Nescit in parvis habitare clausi  
 Sepibus orbis.

Te tuis quondam superata bellis  
 Luna vicinos doceat Planetas,  
 Dum triumphales tacito stupefcit  
 Axe Polonos.

Te sibi crebris Boreale cælum  
 Nutibus, monstrat; tibi laxiores



Dedicat stellas polus , ac utramque  
Destinat Arcton.

Sed tamen nondum facilis precari  
Differas calum , cupidosque soles.  
Regios donec tibi grande canos

Sepiat aurum.

Patriq̄ donec Casimirus hæres  
Arduas sceptro solidabit ulnas,  
Et tibi magnos simili reponat

Prole nepotes.

Serenissimæ Poloniarum  
REGINÆ CÆCILIAE

Renatæ Austriacæ  
PANEGYRIS Lyrica.

O D E LXII.

Post Martiarum robora mentium,  
Dictasque magni non sine numine  
Laudes Vladislai , & suprema  
Sarmaticæ monumenta famæ ;  
Nam quæ disertis meta decentior  
Sit Phæbæ nervis. tendite patrios  
Arcus Camænæ , & cultiora  
Cecropo date tela versu.  
At tu Lechei maxima climatis  
Regina salve. cui modo Regiam ,  
Centumque securas columnis  
Vistuleus lavat annis arces.  
Sed te quietis distinet areis  
Facunda Pallas : seu mare Virginis  
Tranare sit calor papyri ,  
Et docili superare pennâ ,

Rhenana quidquid dissociat fuga  
 Claudique Scaldis; cum facilis regi  
 Arundo permittit sagacem  
 Austriacis equitare campis,  
 Fratrisque mitras visere Cæsaris  
 Loquace chartâ: se tibi Regio  
 Arguâ differente fletu  
 Sarmaticus nova Regna Julius,  
 Novosque spondet mitè loquacium  
 Olim nepotes, murmure risuum;  
 Aulamque vagitu diserto,  
 Et Dominum recreat Parentem.  
 Utcunque vivas pingis acu notas  
 Vincis Minervam; seû adamantinos  
 Accendis argento Planetas;  
 Sèu Phrygiis animata textis  
 Non indecori sidera pollicis  
 Metaris astu: seû melior DEI,  
 Tuique, Divorum supinis  
 Pauperiem prohibes ab aris.  
 Te pone pictis alta curulibus  
 Themis, sereno Te propè Faustitas  
 Exultat obryzo, & repandus  
 Innocuo tibi Candor adstat  
 Virtusque Recto. Tu geminæ Pharos  
 Felicitatis; tu Lechicæ potens  
 Regina LIBERTATIS olim,  
 Et Patriæ meliore buxo  
 Dicere MATER. te sibi limpidi  
 Loquuntur amnes, te resonis Chronus  
 Enarrat undis, vitreoque  
 Deciduus sonat ore Varta.  
 Tibi supinis collibus annuunt  
 Turrata Craci Pergama; te genâ  
 Nixus Bootes, te Polonus,  
 Littavicis sociatus armis,  
 Stratusque densis Vistula puppibus,  
 Postquam maritæ nubere Bathidi



Jussit rebellantes procellas,  
 Oceanos docet inter æstus.  
 Tibi sonorus de glacialibus  
 Iter procellis fingit amabile  
 Nomen, coronatosque fasces  
 Artifici simulabit undâ.  
 Sed jam, Camænæ, Vistuleo metrum  
 Mandemus amni, quod procul Adriæ  
 Transfundat; & torvum RENATAM  
 Erudiat geminare Pontum.

Serenissimo

SIGISMUNDO CASIMIRO  
 POLONIÆ & SUECIÆ  
 PRINCIPI,

recens tunc nato

OMEN GENETHLIACUM.

O D E LXIII.

Quis renidentes volat inter auras  
 Rumor auratis sinuatus alis?  
 Quou jubar nostros iterum serenat  
 Numine cælos?

Quod recens Sidus Lechiæ faventes  
 Mittitis Divi? novus en Polono  
 Phosphorus cælo melioris urget

Omina famæ!

Æmulus magnis Proavum trophæis  
 Nascitur natus. prope jam paterno  
 Noscitur vultu, prope jam paternas  
 Suscitat iras.

G 5

Ille

Ille nativos animabit ausus,  
 Ille vernantes cumulabit olim  
 Patriæ lauros; memoresque laudum  
 Eriget horas.

Ille jam cano virides Parenti  
 E Musurmanis referet triumphos  
 Sedulus campis, Lechicoque Thracas  
 Induct are.

Fallor? an magnis Avus è sepulchris  
 Prodiens natum manibus nepotem  
 Sustulit, parvos gelidis premens am-  
 plexibus artus?

En sibi frontem similesque vultus  
 Lætior spectat! probat en lacertos;  
 Et suis quondam, superos precatur,  
 Floreat annis!

Cresce, jam dicit, Casimire, cresce.  
 Cresce centenis cumulate lustris,  
 Dum tibi noster meliora condit  
 Sæcula pulvis.

I, tibi pressos imitere passus,  
 Quâ tibi magnæ patet aula Famæ;  
 Quâ tibi nostros referet Polonus  
 Orbis honores.

### Emblema Præsentia DEI.

Sphæra seu Circulus, pro puncto habens  
 Oculum.

#### O D E LXIV.

**C**Ur tot pervigilum lumina fiderum  
 Pro clausis Superùm postibus excubant?  
 Et longo ordine castra  
 Metantur, duce Cynthiâ?  
 Ac Phæbi quoties fulva recesserit  
 Fax, Tartessio naufraga Nereo,

Cur



Cur centum vigilare  
 Ignes Numina iusserint.  
 An fors centoculi fabula verior  
 Argi nunc etiam vivit; & ignei  
 Nostras despicit oras  
 E custodia agematis?  
 Sic est? sic, tenebris dum malè credimus,  
 Securoque nigræ noctis in otio  
 Frustra fallere mundi  
 Conamur vigilantiam;  
 Cælos non fugimus: nulla diem polo  
 Insomnesque oculos eripuit quies.  
 Nostram sedula scenæ  
 Spectant astra Tragædiam.  
 Infundas sceleri vesta Caristici  
 Ferramenta soli; vel laquearia,  
 Quis concordia calcis  
 Cælum surripit & diem,  
 Claudant te Niobe viscere saxeo,  
 In venisque tegant Marmaricæ suis  
 Cautes, non fugis usque  
 Censores oculos Dei.  
 Non secreta Paros, non Mareoticæ  
 Servabunt silices. Splendidus vitro,  
 Sinceræque nitore  
 Cristalli, patet abdita  
 Telluris facies. cernitur ilicêt,  
 Qui se Carpatiis rupibus obruit;  
 Aut in Marmoris alyo  
 Patratum sepelit scelus.  
 Ergo qua geminis collibus eminet  
 Vernans Aoniæ Regia Phocidos,  
 Scandam, & pectinis ictu,  
 Hoc laurum viridem super  
 Incidam, memores quod sibi posteri  
 Pandi Emblemata legant sole supercili;  
 Blando carmine feris  
 Enarrentque nepotibus.

In parvo teretis pectore circuli  
 (Sphæram docta vocant Palladis atria)  
 Pro puncto vigilantem  
 Pupillam vigilis DEI.

Tunc scisso tenero pectine cortici  
 Has insculpo notas: Quisquis ades, cave,  
 HINC SPECTATOR in orbis  
 Scena cuncta videt DEUS.

AD

## REGNALDUM ANTIMUM.

Cum in Angliam vela daret.

O D E L X V .

**N**IL te, nil moror, Antime.  
 I per cæruleæ jugera Balthidis;  
 I, quæ vitrea Nerei  
 Magnas ira rates frangit; ovariantibus  
 Malum stringe rudentibus,  
 Optatæ repetens littora patriæ.  
 Illud deprecor unicum,  
 Illud sallicito suggere carmine,  
 Ne noster madidis amor;  
 Quo tecumque ferant æquora turbine,  
 Extinguatur in annibus.  
 Undas spernit Amor; nec minor in tuis  
 Fervet Neree fluctibus;  
 Et flammæ medio suscitât in freto.  
 Quin & naufragium pati  
 Unus nescit amor. Cum redeuntibus  
 In se clauditur annibus  
 Ignes sub gelido concipit æquore,  
 Nil fatis trepidus suis.  
 En jam prædomitæ murmura Balthidis!  
 En sopita jacet Thetis!  
 En pigris titubant æquora fluctibus,

Paca-



Pacatque silent Noti!  
 En recline suos ad scopulos mare,  
 Lentis somnia sibilis,  
 Et pacem modico spirat anhelitu!  
 En jam vela modestior  
 Imprægnat teneris aura Favoniis!  
 Sensim suppara fluctuant;  
 Et malus placido motus ab Africo  
 Festis infremuit Notis,  
 Et blande graciles scidit Ethesias.  
 Jam sensim raperis mihi  
 Paulatimque peris Antime: nec nisi  
 Te fas luminibus sequi.  
 Quin ipsis etiam luminibus peris.  
 Ergo dum fugientia  
 Excludunt oculos lintea, vividis  
 Te votis comitabimur.  
 Nam quo non oculis, itur amoribus.

AD

Serenissimum

SIGISMUNDUM  
CASIMIRUM

POLONIÆ ET SUECIÆ  
PRINCIPEM.

ODE LXVI.

**E**T tu Polonis Regibus inclytum  
 Accede fidus. cui prece consona  
 Adspirat Europæ & Lecheum  
 Fatidico voyet ore sceptrum.  
 Quid jam Paternum? Quid *Jagelonium*,  
 Inter tenellæ vincula falcis

Mo-

Moliris, o puer! Poloni  
 Splendidior Cynosura Regni?  
 Quid bellicosus dignus Avis nepos,  
 Balbutienti non pueriliter  
 Portendis in fletu? quid iste  
 Ingenuo stimulatus æstro  
 Præfagit ardor? num Proavis pares,  
 Nec annuenti dissimiles Avo,  
 Magnóque laudandos Parenti  
 A teneris velit usque cunis  
 Actus redordiri! An lacrymabili  
 Fletu morosum damnat Oniona?  
 Pigrósque naturæ labores  
 Sæpe vocans modicas rotarum  
 Incusat horas? scilicet inclyta  
 Nequit sub ipsiis gloria fasciis  
 Latere; formosamque pulchris  
 Invidiam coquit in medullis  
 Avita virtus, nescit idoneus  
 Tepere parvis ardor in artubus,  
 Primoque vagitu Polonis  
 Esse licet generosiores,  
 O quantus armis! quantus evantibus  
 Crescis Lyceis, Austriacæ recens  
 Propago famæ! quantus olim,  
 Cum teneros tibi major atas  
 Durabit annos! quantus in obvios,  
 Martis corusco vectus in effedo,  
 Ibis Musurmanos, tuóque  
 Bella redux referes Parenti!  
 Et hæc, sed olim, dum sólidas tibi,  
 Post acta parvæ tempora fasciæ,  
 Armabit in vires fidelem  
 Mars animum, patrioque pectus  
 Accendet igni; nunc teneris Avum  
 Patrémque sensim, magne nepos, sonis  
 Gestuque coneris minori  
 Et lacrymis imitari in ipsiis.



DEI MATRI VIRGINI.

Ad oden Ecclesiasticam Parodia.

O D E LXVII.

**F**Allimur Vates, quoties superbo  
Carminum fastu celebremus illa,  
Quæ pedum plebes minor, & supinum  
Vulgus adorat.

Vera laus plebem fugit, & remotas  
Incolit nubes. populare quisquis  
Murmur auscultat calamos inani  
Atterit arte.

Te, tuus vates, cano, GLORIOSA  
VIRGINUM VIRGO, tibi subjugata  
Aureum sternunt caput, & coruscas  
Sidera crines.

Tu, licet parvum tibi pendet uber;  
Hunc propinato satiassè lacte  
Diceris, qui te dominâ puellam  
Voce creavit

Quod suis quondam male pasta pomis  
Eva, patritæ coriphæa noxæ,  
Abstulit; mundo *bona mater* almo  
Germine reddis.

Ut suo tandem lacrymosa fletu  
Possit oclusos subiisse cælos  
Turba; tu pandes vitreo fenestram,  
Virgo, sereno.

Jure te summi patulam vocamus  
*Januam* Regis; tibi panda viva  
Lucis hinc, illinc radiat trecentis  
Porta lucernis.

Ergo jam vobis ope virginali  
Redditam, gentes geminate vitam.  
Quas Mariani canimus redemptas  
Merce cruoris.

AREO.

## A R E O P A G U S.

Lento procedendum esse in iudiciis  
ferendis, ni valli velimus.

## O D E LXVIII.

**T**ardo moveri dicitur ambitu,  
Quodcunque falli nolit. & abditas  
Errare per sortes, fideli

Judicium comitante vero.

Hoc & rotari difficilis sacro

Hinc inde claudit lamina pefculo;

Mensesque pendentésque Lunæ,

Et propriis bene ponderata

Momenta lustris. Hoc paribus penes

Appensa nodis se gemino librat

Statera pondo, accommodante

Ponderibus sua vincla mole.

Hoc replicato circuit ordine

Matura lento Canities gradu;

Moræque, perspicaxque vitas,

Et veteris monumenta Numæ.

Hoc & trecentis, non sine Numine,

Accincta curis pectora, & impiger

In astra candor, & quieti

Ver animi, capitísque sudum.

At retrò fertur sub juvenilibus

Imberbis acri se Levitas situ

Tulisse pennis; & profanus

Consilii popularis ardor,

Præcoxque dictum. retro minacia

Prava appetentis tela Cupidinis:

Timorque desidesque Curæ, &

Præcipitis genius Juventæ.

Sic est: sepultus sub volucris latet

Error cerebro, sæpeque præpeti

Dum fidit auræ, ventilatas

Consilium male perdit alas.

Qui-



Quicumque summis arcibus imperans  
 Incerta legum iurgia dividis,

Causasque, temperasque rixas.

Et stabilis pia jura Recti.

Tardo moveri iudicium ambitu

Edisce Præses. Sæpe procacibus

Perire festinata votis

Vota solent; mediumque certi

Habere fertur, qui genitum diu

Cita peregit consilium manu.

Sed multus olim iudicandi

Præcipitem comitatur error.

Fit sæpe virtus, quod fuerat scelus;

Ipsoque passim in fine beator

Virtusque, virtutisque fulgor,

Degeneri latuit sub umbrâ.

Sic ille puro lucidior vitro,

(Postquam coacti nube supercilii

Illime cælorum serenum,

Ac hilares tremefecit ignes,

Spissata multos nubila Jupiter

Liquans in imbres) sol tetrico caput

Immersit in peplo, & diurnum

In nebula sepelivit aurum.

Quis tunc aviti sidera luminis

Condemnet illo cæcior impete?

Ipsumque cæcutire solem,

Et vigiles periisse stellas,

Totumque tristes in tenebras polum

Isse dicat? splendidior brevi

Redibit, illustresque Titan

Mundi oculos melius repero

Accendet igni. sic brevior mora

Plerumque falsâ conditum imagine

Correxit errorem; ac in una

Judicium reparavit horâ,

Solemque terris reddidit; & simul

Obscura claro nubila pollice

Cælumque detergens molestæ  
 Siparium replicavit umbræ.  
 Ergo volantum turba Cupidinum  
 Maturioris iudicii sacris  
 Abscedat à rostris ; volucres  
 Inde procul fugiant calores.

SE MULTUM POESI,  
 MARIANA PRÆSERTIM  
 DELECTARI.  
 ODE LXIX.

**O** quâ Regia carminum  
 Vernat Pieriis aula tapetibus,  
 Et celsum gemino caput  
 Ostentat superis in diademate !  
**O** quâ Pegaseis salit  
 Sacri collis amor excitus unguis,  
 Puro Peneus agmine!  
 Huc me Castalios, huc, super alveos  
 Reclinem volucres Noti;  
 Huc picto revehat Cynthius effedo.  
 Hinc me de bifido licet  
 Suggestu miserâ tristitia Principum  
 Despectare pericula,  
 Et Regum cineres, Hinc titubantium  
 Formido patet urbium.  
 Hinc orbis dubius stare labantibus  
 Hinc illinc minor arcibus.  
 Hinc confusa solo sedulus æquora,  
 Et mistas numero domos;  
 Vivorumque gemo funera Cæsarum.  
 Hic, unus mihi celsior  
 Non obscura polus lumina suggerit,  
 Auratas revehens dies;  
 Inclusumque sibi cum vigilantibus

Com-



Commendat Superis DEUM.

Huc mī, (nam quid obest?) ferte recondita  
Theſauris melioribus

Vel dilecta mei barbata *Sarbita*,

Et pompam lyricæ chelis

Vel terſum Calabri carmen *Horatii*,

Si turpi careat joco:

Aut cantata gravis prælia *Virgiliti*.

Hic & feſſa minor pedum

Infundam niveis brachia liliis.

Hic caſſos hilaris dies

Solabor quærulæ murmure tibix.

Quod ſi, Dia parens, tibi

*Cordi Muſa mea eſt: nec tenuem rudis*

Buxi ſpernis anhelitum;

*O quanto feriam ſidera vertice!*

Non jam Nectareis ego

Dulcorata favis carmina condiam,

Nec teſtudinis ebrix

Largi mellis ebur Dardanium velim

Ut mī ſuppleat alvear.

*Non me viſceribus plus faciat ſuis.*

Mecænas Latii decus.

*Non monſtrer digito prætereuntium*

Argutæ chelis artifex,

Si me Virgo tuis vatibus inferis,

O quam dixero verius,

*Quod ſpiro, & (ſi placeo) raum eſt.*

AD

## THOMAM TALIARCHUM

Cum aliò evocatus migraret.

ODE LXX.

CUM meæ plenus, nimiuſque terræ  
Patrios linguo, Taliarche, cælos,

H 2

Cur

Cur inexplētis tua me retentant

Vota querelis?

Patriam mecum fero; mundus ipse

Patriam vastis mihi præbet oris.

Exulem me non faciet remotæ

Ora Canopi.

Ipsē se fallit sibi quisquis unum

Destinat Regnum, patriosque soles.

Orbis est hæres homo totiusque

Incola mundi.

Ipsa civilem mihi Bactra solem

Inter Arctos referunt procellas.

Ipsē nativi Tanais propinat

Flumina Rabæ.

Seū per accensos Orientis æstus,

Seū per undosos Aquilonis imbres,

Seū ubi canus gelidas Bootes

Increpat ursas

Sive juratos hyemi triones,

Seu feros visam Lybiæ calores;

Patriæ nubes comitesque mecum

Ibitis auræ.

Me nihil præter propriique gestem

Pestoris censum; nec avara posco

Divitis Cræsi juga: nec superbi

Stagna Neronis.

Non mihi fuscis comes ibit alis

Tædium; totus feror, & relictas

Nil moror gazas, nec amœna nostræ

Prædia terræ,

Me nihil præter cupiens; quid ultra

Tædio mistis voveam querelis?

Nesciunt plenis supereminere

Tædia votis.



Prodiga militaris pompæ jaſtantia.

O D E LXXI.

U Num, Quirites, cætera diſtuli,  
 Monebo vates, dicite, quid retro  
 Centum coronatos trophæis  
 Magnanimis peperit parentum,  
 Dextris triumphos? an framæ jubar,  
 Serenioris fulgure lamina  
 Diem laceſſens? an ſonoræ  
 Mancipium gladius catenæ?  
 An pictus umbo, vel clypei timor?  
 An teſta Marſis terga leonibus?  
 Juſſæque in imbellis lacerti  
 Excubiis vigilare lynces?  
 An pelta flavis æmula ſolibus,  
 An delicati ſyngrapha verticis?  
 An criſta, Phænicisque caudæ  
 Raptus honor, Lybicisque conus  
 Criſpatus alis? an celeres pedum,  
 Doctique tergum vertere barbaro  
 Equi, volaciumque plantæ  
 Cornipedum, malè cum jocantes  
 Metimur agros? Non Arabas pudet  
 Equos patriæ merce pecuniæ  
 Emiſſe; nec fugiſſe Thracam  
 Thracis equo, Scythiæque turmas  
 Ac exprobrantem Maſſagetem pudor  
 Audire, noto cum ſibi cornipes  
 Arriſit hinnitu, & Gelonos  
 Poſcit equos, dominique tortum  
 Rumpit lupatum, cum trepidum ſolo  
 Herum ſeveris non ſine pulſibus  
 Alliſit; excuſſumque Threſſis,  
 Opprobrium grave, liquit agris.  
 Qui cum Gelonis bella gerit pedes,  
 Eques triumphat; ceſſior hoſticis

Gestitque sub pennis videri,  
 Et spoliis equitare raptis.  
 Quod si fugaces terga dabunt Dahæ;  
 Ferro, Quirites, alite transfugas  
 Sequamur. aut frustra pharetris  
 Pennigeras gerimus sagittas  
 Et juncta nervis cornua? si timor  
 Plumavit alis brachia; non amor  
 Pulchrique plumabit cupido?  
 Nonque pedes pedibus triumphis?  
 Opprobrioso brachia stigmatè  
 Sat est notasse; & vindicibus Getas  
 Monere telis, ne Gradivo  
 Invideant, rapiantque frontem  
 Quin si sequaces effugiant globos,  
 Et persequentis vulnera spiculi;  
 Non tela transfugæ pudoris  
 Effugient: satis est volaci  
 Torvum tuentis tergora Concani  
 Signasse plumbo; sat fugientium  
 Theatra spectasse, & fugaces  
 Myrmidonum numerasse scenas.  
 Vel si Geloni tantus amor coquit  
 Equi, Quirites; non pretio; manu,  
 Ferroque, plumboque, & repenti  
 Merce globi, framæque censu,  
 Equos emanus. Jam Scythicæ tument  
 Turgentque ripæ. mille fremunt equi,  
 Manduntque cernui micantes.  
 Assyrioque Phrygioque fuco  
 Bullasque fransosque. Ite, diem tubæ  
 Dixere, grandes Martia nundinas  
 Pangæa vulgârunt: cruenti  
 Cornipedes meliøre censu  
 Vendentur ensis; qui caput æmulo  
 Turcæ Polono demet acinace,  
 Martique sacrabit, Geloni  
 Cornipedis patietur emptor.



PRO SERENISSIMO

## POLONIÆ ET SUECIÆ

PRINCIPE

SIGISMUNDO CASIMIRO.

AD MATREM.

O D E LXXII.

**G**radive, nostris patrium terris jubar,  
 Præses Poloni Nominis:  
 Seu te cruentis, nil sui sexus memor  
 Bellona pascit cædibus;  
 Seu te feroces ensium nudus pavor  
 Inter Corallos recreat;  
 Decede campo, deserat cassis genas,  
 Conisque fulmen exuat;  
 Frænata multis rideat lauris coma;  
 Sagoque succedat toga.  
 Dum vagientem Principem Polonia  
 Pacata nutrit Regia,  
 Cur pervicaces tinniant Martis tubæ,  
 Cur æra nubes puniant?  
 Absiste murmur grandius; solus novi  
 Poloniarum Principis  
 Vagitus auras mulceat; solus suo  
 Soletur astra murmure.  
 En, ut severas inter hastarum minas,  
 Interque pilorum nemus  
 Replisse vellet! ut hilarem victricia  
 Per arma prospectum jacit!  
 Ut pænæ galeâ parvulum claudi caput,  
 Equove sublimis vehi,  
 Ut pane vellet ferreo tegi sago  
 Avara Martis indoles!  
 Ut, si feroci personare classico  
 Æs militare cæperit;

Siticulosis auribus belli graves  
 Bibisse gratatur sonos;  
 Paruisque manibus horridæ applaudit tubæ,  
 Nutuque frontis annuit!  
 Cæsi ipse Martis admoneretur & eâ  
 Ad pugnam vocaretur tubâ.  
 O! si viriles stare jam possent pedes,  
 Aptumque cassidi caput;  
 Quantum fatiscenti Austriæ, & Bohemæ, tibi;  
 Avunculoque Cæsari!  
 Quantum labanti penè jam Silesiæ  
 Columen decusque surgeret.  
 At, differ arma paululum, & minas puer  
 Iramque fletu dilue.  
 Absiste ferro. Te brevi & Avi & Avunculi  
 Agnoscet ultorem Gothus,  
 Agnoscet omnis Suecia, & ferox Getes  
 Sævæque tela Tauricæ.  
 Nunc desacratam fœderum præstat fidem,  
 Ferri silentio coli.  
 Quid pertinaci diffuis fletu, puer?  
 Martemque lacrymis cies!  
 Absiste paulùm; dum tibi majus caput,  
 Majore lauru frondeat.  
 Adolescat iste Regiæ frontis calor.  
 Matura vindicta acrius  
 Sentitur olim: tutius quondam solet  
 Adultus armari furor.  
 Accrescat hisce viribus suus vigor,  
 Accrescat animus corpori;  
 Capaxque Martis indoles capacibus  
 Incorporetur artubus.  
 At tu magistrâ protinus pubem novam  
 Gradivi flecte dexterâ.  
 Parvam Lecheis impleas armis manum,  
 Magnoque cognatum Patri  
 Avoque pectus, jam, licet panni vetant,  
 Dostâ propines dexterâ.



Maturus olim nobilem exprimat manu  
 Avum, Patrisque laureas.  
 Hic Martiales incoquat fibras furor,  
 Hic entheata pectora,  
 Te, te Magistro, te imbuat sub præfide,  
 Gradive bellorum Pater.  
 Nunc fasciatus, supplici minor pede,  
 Ter osculatus texteras,  
 Jam jam futuro tela, jam lauros para,  
 Para trophæa militi.

## A D A P E M.

## O D E LXXIII.

**A**Rtifex mellis, cui delicata  
 Inde nativo cutis ardet auro;  
 Inde prælustres tenuis revolvit  
 Bractea pennas.  
 Cum tibi molles Zephyritis herbas  
 Inter illimem referavit hortum;  
 Carpe jam tandem pretiosa picti  
 Damna vireti.  
 Hic ubi lassas mea Musa pennas  
 Inter æstivos nemorum lepores  
 Dulciter torquet; cruciatque crebris  
 Metra lituris.  
 Hic mihi stricto leviter susurro  
 Jam fatigatas recrea Camænas,  
 Ausa cantanti citharæ tuum con-  
 jungere murmur.  
 Sed quod illustres tibi subter alas  
 Incipit parvum trepidare telum?  
 Quod vibras, eheu! modicâ timendum  
 Vulnus ab hasta?  
 Jo surgamus, nimis expeditis  
 Fulmiant parvæ volucres sagittis.  
 Heu dolor! quantas Apis ipsa, quantas  
 Concipit iras!

AD

## ARTEMIIUM MOENIIUM.

Ne suo æmulo minor animo de-  
jiciatur.

## O D E LXXIV.

**E**Rrore, Mœni, discitur. Acrius  
Post victa miles prælia dimicat :  
Pulchroque flammatus calore  
Egregios iterat triumphos.  
Fors & minori percitus impete,  
Entellus olim straverat arduum  
Dareta; ni fallente gressu  
Non humilem Phrygiis cachinum  
Movisset armis. ast ubi sordido  
Fædâ fimo membra levaverat,  
Viresque collegit, superbum,  
Indomitis juvenem lacertis  
Et ipsa stravit munera. Sic humo  
Allisus olim fortius Herculem  
Lussisse Gerion, & ipso  
Dicitur exagitasse lapsu.  
Proh! quanta nigris funera Manibus  
Incerti adactus vulnere spiculi  
Demisit Æneas! quot olim  
Cornigeros Leo stravit uros;  
Postquam recepti vulneris immemor  
Totis Leonem viribus advocat;  
Fusoque non ferendus hosti  
Magnanimum fatiat furorem!  
Assurge magnis ausibus Artemi,  
Quanquam superbo victus ab æmulo,  
Herbamque laurumque, & decoros  
Obtuleris Dario corymbos.

Spe-



Sperare victus plura potest: minus  
 Sperare victor. te gravis interim  
 Soletur Entellus: vetusti  
 Historiam renova Daretæ.

INTER MAGNAM

ET

PARVAM SORTEM

DIFFERENTIA.

Ad Ambrosium Montanum.

ODE LXXV.

**I**Mus: tu volucris vectus ab Africo  
 Æthram præpetibus scinde jugalibus.  
 Me terræ proprior semita tutius  
 Prono tramite duxerit.

Tu, Montane, cave, ne nova fabula  
 Mutes Icariis nomina fluctibus,  
 Quamvis perpetui stabra Favonii  
 Miti murmure perstreant.

Me, quò fata velint trudere, non habent,  
 Afixum tumulo. quod mihi denegat,  
 Det fortuna tibi, dummodo quod tibi  
 Nunquam surripiat mihi.

Vis quo differimus? tu metuis: mihi  
 Circumscripta truces spes jugulat metus.  
 Debes quidquid habes. cuncta negantibus  
 Fatis nil ego debeo.

AD

D. THOMAM AQUINATEM.

Theses Theologicas defensurus.

ODE LXXVI.

**D**Ive, cui fulvi radiis obryzi,  
 Pensili Titan simulatus auro

Pectus

Pectus accendit, solidoque fufum

Lumine torquem.

Cum tuæ quondam placita alta Stoæ,

Nec leves noſci monitus calenti

Affero luçtâ; tua bella miti

Luce ferena.

Non opus toto mihi, Dive, ſole,

Qui tibi compto reverenter igne

Pectus offulſit; radius clienti

Sufficit unus.

Hoc graves mentis tenebras, & altam

Ingeniî noctem poteris beatâ

Luce ſolari, viduasque ſacri

Luminis umbras.

*Dithyrambus ob titulum*

## DEI MATRIS VIRGINIS:

Mariæ Matri noſtræ collatum, exultans.

Ipſa diæ ſalutatæ ab Angelo Virginis.

### O D E LXXVII.

**I**Te vota, fæderatas

Queis Amor plumavit alas;

Ite, prona ſibilantis

Africique, Japygiſque,

Obſequente colla loro

Inter alta nantis auræ mancipate iurgia:

Ite; quod rebelle pictas

Pondus alligavit alas?

Ite; jam latus ſequaces,

Jam maritant vela, venti,

Jam ſuave ſomniantis



Trudit alas, trudit auras Æoli suspirium.

Illa nati Mater orbis,

Illa nostræ fidus oræ,

Illa nostri Luna cæli,

Virgo casta, prole castâ

Mancipatum ditat orbem,

Et Tonantis esse MATER, VIRGO cum sit,  
dicitur.

Io nubilum severas

Stringe cælum, stringe brumas!

Cur noverca de profanis

Tela funduntur pharetris?

Cur procellis horret hirta,

Et pruinis spargit arva; nubium protervia?

Cur apricos radit hortos,

Cur Aprile mordet aurum

Congelatis alga canis!

Frondium tonfor November

Num reciprocante brumam,

Et nivalis cana cæli rostra, trudit effedo.

Ite, vota fæderatas

Quæis Amor plumavit alas;

Ite Flora quâ perennis

Veris inter officinas

Comit hortos, peçtit herbas

Muficusque pictæ lucus altra terræ fasciat:

Quâ per altos oscitatur

Feriatus Eurus agros!

Quâvé passo crinuntur

Sempiterni flore campi;

Quâ capillat ebriosas

Liberali nectar amne Floræ nantis insulas,

Ite flores delicato

Quos inaurat Chloris auro;

Quos Clitumnus vagienti

Plorat amne; cum marito

Temulenta terra rore

Pulchra laxat & relaxat Veris hirti stemmata.

Ite lauri, nostra pictis

Irri-

Irrigate tecta nimbis.  
 Explicatis auspicatus  
 Ambulet Majus capillis.  
 Et procella nil nocentis.  
**Liliet** magna scribat Magnæ Matris omnia.  
 Ite flores, quæ serenis  
 Compta ridet aura cirrhis;  
 Ite calthæ, Virginisque  
 Stemma latè naufragantis  
 Quæ cachinnat imber auræ  
**Prænotate** mollè fufis liliorum literis.  
 Scripta nostris æthra prælis  
 Te serenas edocebit  
 Virgo stellas, te *Parentem*.  
 O Maria! curiosis  
 Illa commendabit astris;  
**Differetque** interroganti digna cælo nomina,  
 Dicit auro, quæ coruscans  
 Phæbus explorat Planetas.  
 Qua tiaris casta Phæbe  
 Ardet albis, & minores  
 Præna flectit inter ignes,  
**Edocebit** Arcton magna *magna matris* symbola.  
 Ite flores; perge Virgo,  
 Hospitas quæ laxat æther  
 Sponte scenas; eruditi  
 Quævé se Maji procellis  
 Ominatus pingit imber;  
**Et diferto** vere pingit stemma *MATRIS VIRGINIS*.

AD

**STANISLAUM NOLIUM**  
 AMICUM ÆNIGMA.  
 O D E LXXVIII.

**N**Oli, propinquo jam gravior die  
 Aurora plorat. Jam properâ fugam  
 Invasit



Invasit Arcturus curuli;  
 Jam refugæ periëre stellæ.  
 Sic ille Titan nubibus æmulos  
 Proscribit ignes? sic face cum pari  
 Fulfisse, rivalesque cælo  
 Ferre nequit Phaëton Planetas?  
 At hæc scienti. ducimus interim  
 Obliviosi pocula fluminis;  
 Novumque miramur serenum  
 Emeritâ refides sub umbrâ.  
 Quod si procaci læsus arundine  
 Scheinerianum corripiam tubum;  
 Ne cernat orbis inquinati  
 Pauperiem maculasque Phæbi.  
 Parum furenti distat acinace  
 Obtusa læsæ parma modestiæ.  
 Flammantur, in justumque mites  
 Degenerant animi furorem.  
 Callosa sacræ frons Patientiæ  
 Importuoso deteritur situ.  
 Erumpit insepultus ignis,  
 Dum gelitum quatitur metallum.  
 Nunc lætiori mente coercitam  
 Compono bilem. Jam steriles minæ  
 Cessere. Pro Tridente Fulmen,  
 Proque olea fero sponte laurum.

AD

## JACOBUM CARVALLIUM.

O D E LXXIX.

**I**Mus? an frustra graviore bruma,  
 Omnis iratos ligat unda fluctus?  
 Imus? an frustra solidat gelatos  
 Vistula pontes?  
 Hic ubi nuper renuente nosci  
 Semitâ vastæ rediëre naves;

Jama

Jam volant currus, & adacta pulsus  
Rheda caballis.

Nosque dum sese vitreus per undas  
Porrigit fornix; vada tutiori  
Calce metimur, madidasque ficcis  
Passibus undas.

Nulla, Carvalli, sibi constat ætas.  
Annus incertis equitat quadrigis.  
Certa convolvi properant fugaces  
Tempora menses.

Martio vernum fugiente cœlum  
Vitreas vinctis pedicas fluentis  
Demet Aprilis, gelidaque solvet  
Vincula ripæ.

Quam modò tuto terminus cothurno  
Semitam, torvæ rapiens procellæ;  
Et ferent Balthum super æstuosis  
Frangere ventis.

O nimis fluxæ simulacra laudis,  
Quam modò tanto licitamur æstu!  
Non secus nostræ cita transmeant ve-  
stigia Famæ.

AD

Serenissimum

SIGISMUNDUM  
CASIMIRUM  
POLONIÆ ET SUECIÆ  
PRINCIPEM.

Vota Musarum.

O D E LXXX.

**H**ic quæ Poloni culmina Carpathi  
Fastigiatis sidera collibus.

Intrant



Intranr , Polonicosque Fasces  
 E viridi tumulo propinquis  
 Narrant Planetis ; dicitur Attici  
 Ferro Tyranni territus è suo  
 Apollo demigrasse Cyntho ,  
 Et comites revocasse Musas ;  
 Et pro diferti flumine Penei  
 Præterfluentis litora Vistulæ  
 Fessis propinavisse Divis ,  
 Et Lechicas habitare subter  
 Jussisse stellas ; quidquid acutior  
 Frolusit ætas ; quidquid amabiles  
 Mendaciorum sub fideli  
 Auspicio cecinistis anni ;  
 Huc te sonoris , huc dociles vocant ;  
 O bellicosæ gemma Poloniæ !  
 Merris Camanæ. Hic erudito  
 Hospitium tibi Phæbus ipse  
 Inscribit auro. Jam tibi , jam rudes  
 Appollinaris præscia laureæ  
 Thalia dedolat tabellas ;  
 Jam calamos , cytharasque Clio ,  
 Aptatque libros. Jam tibi Gratix  
 Facunda cultis verba leporibus  
 Velint propinare , & sacratos  
 Eloquio graviore fontes.  
 Te laureati portitus orti ,  
 Novumque nostri culmen Apollinis  
 Suspirat ! & quondam futuris  
 Luna Vigil Vigilesque noctes  
 Serena charis lumina dedicant.  
 Cum doctus olim Nestoream libris  
 Demes senectam ; cum per altos  
 Ingenii ruet ala campos.  
 Hic tu , Polonæ Nestor adorea ,  
 Olim futuris jura nepotibus  
 Dices ; Palatinosque fasces  
 Pegasæ recreabis unda ;

Ac in Lecheis collibus hospitas,  
 Maturus olim Sarmaticis, caput  
 Levasse sub gemmis Camænas,  
 Magnanimo similis Parenti,  
 Miti fovebis lumine. Tu brevi  
 Docto fluentem vortice Peneum  
 Cynthumque, Parnassique culmen  
 Ingenuo repetes Mucrone  
 An ne in tenellis jam tibi fluctuat  
 Apollo labris? jam ne animosior,  
 Ipsoque vagitu disertus,  
 Patricias moderaris aures?  
 Blandæque tandem, currite sæcula,  
 Dixere Musæ, currite pervii  
 Annique mensesque, & trecentis  
 Brachia conduplicate pennis.  
 Citumque nobis sistite Principem  
 Inter Polonæ limina Phocidos;  
 Ut oris & maturus ævi  
 Castalios vacuet canales.

## FLORA REGALIS.

Ex amænissimis REGUM POLONIÆ  
 hortis in Suburbio Cracoviensi sitis,  
 quos identidem per ferias æstivas in-  
 visebat, expicta.

### O D E LXXXI.

**S**i nec patentes tennis hortorum domos  
 Ac plana Floræ compita;  
 Huc, huc, curules Pegasi pennas super,  
 Apollo ludorum Parens,  
 Huc laureatos coge Musarum choros,  
 Blandosque metrorum sales.

Descende



Descende Cyntho, præfer hortos rupibus;  
 Scabrumque Parnassi caput  
 Postpone teneris æsculetorum thoris.  
 Præpone flores cautibus.  
**Hic** ipse passis ambulat Majus comis,  
 Majoque cognata otia  
 Sub explicato frondium tentorio  
 Compris amænantur jocis.  
**Hic** mitigati blandius Favonii  
 Mulcent apricantes rosas.  
 Ipsi te odoris provocant suspiriis  
 Flores, gemelli fiderum,  
 Hiantibusque casta diducunt labris  
 Et pollicentur oscula.  
**Hic** fæderatas Africus sopit tubas,  
 Lenesque somniant Noti:  
 Gratoque Zephyrus halitu flores fovens  
 Miti cachinno verberat.  
**Hic** oscitantes provehunt Etesia  
 Renata veris gaudia.  
 Ridet pudica floreat fratres rosa:  
 Repanda rident lilia,  
 Lenique ventorum increpatæ murmure  
 Sese alloquuntur arbores.  
**Hic**, te disertum verberante barbitum,  
 Jucunda nutabunt sata;  
 Nutabit omnis frondium saltu rosa,  
 Tardique saltabunt rubi.  
 Saltabit hortus; & levi ductas choro  
 Gyrahit æther arbores.  
**Tenebit** acres interim buccas Notus,  
 Grandæque mutescunt soni,  
**Et** complicato jurgiorum murmure,  
 Raucus filebit Africanus.  
**Quin** nec propinquas alloquetur arbores  
 Arguta volucrum cohors;  
**Sed** cuncta mutum sopiet silentium,  
 Blandoque sternet otio.

Et sola tantum Etesiarum flamina,  
 Ac mollis auræ fibili  
 Inter loquaces mustitabunt dactylos,  
 Vocemque conjungent lyræ.  
 En discolori flore lucentes patent  
 Herbasque pascunt aræ,  
 Suasque duro fiderum senatui  
 Immunitates explicant,  
 Et tot sigillis, panè quot rosis, tument,  
 Suasque signant literas!  
 En claudit hortus flosculos sambuceis  
 Incarceratos sepibus,  
 Textisque castæ Chloridis colonia  
 Sese coronat manibus!  
 En illa teneri veris adolescentia  
 Crispantè juvenescit solo!  
 Pudica ab ipsis floribus Floralia  
 Luduntur, & terram beant,  
 Ac æmulandas libero stellas polo  
 Tuentur, & cælos petunt.  
 Hinc illa florum nititur in altum seges,  
 Nubesque paulatim subit,  
 Ambitque cælos. hic tibi *Virgo parens*,  
 Tuoque sacra Nomini  
 Hic eloquentes educat tellus notas,  
 Tuumque pingit Symbolum.  
 Hic sub ruborum densiore milite,  
 Crebrisque spinarum Rosa  
 Horrescit armis; crederes rursus in suo  
 Videre Danaen carcere:  
 Et rursus Helenam subter armorum minas  
 Suo reservari proco.  
 Hic erubescit, hic suos pallet rubos,  
 Spinasque cælat frondibus.  
 Hic delicatas aureis mitras pilis,  
 Flavumque crispat verticem,  
 Et pertinacis vellicans hamo rubi  
 Ad se viatores trahit;



Ac tot decoris replicata coloribus  
 Varia meretur nomina.  
 Nunc vulneratæ floridus terræ cruor ;  
 Nunc parva stellarum sörör :  
 Nunc castiori consecrata lumine,  
 Pudica pratorum Venus :  
 Nunc osculati Veris obrysum salit  
 Sese votari basium.  
 At si MARIAM Mysticam voces Rosam,  
 Totâ rubescit purpurâ :  
 Totoque cydaris aureæ motu tremens  
 Tantâ superbit æmulâ.  
 Pubescit illinc , attamen jam sutili  
 Canescit argento solum ,  
 Et florulento lilieta frigore  
 Latas inundant areas ;  
 Vernoque lacte languidum quassant caput,  
 Æstatis innocentiam,  
 En ut minutim fluctuant , & è suis  
 Suspensa pendent caulibus !  
 Ut candidatis turbinata paginis  
 Album merentur calculum ,  
 Et sustinentes grandius premunt bases,  
 Flavoque rident stamine !  
 Illinc jocosø pensiles suspensio  
 Irridet aura flosculos ;  
 Vernansque socias inter Hyacinthus rosas  
 Crispante stipatur comâ.  
 En Caltha, florum Proteus, totos suo.  
 Intexit agros vellere.  
 Imparque proprio ponderi ora languide  
 Acclinat ad terram osculo.  
 En explicatis Tulipæ captant labris  
 Amæna Phæbi lumina ;  
 Et, si vel atrâ pellitur noctis rotâ,  
 Vel insepultus Nubibus  
 Titan serenas invidet mundo comas,  
 Turbante Cauro sidera ;

Et illæ apertos protinus claudunt sinus,  
 Tristemque vultum contrahunt.  
 En ordinatis carminatim lineis,  
 Se spica Nardi porrigit!  
 Florentibusque Rosmaris tua radiis  
 Sese coronat infula.  
 Illinc verecundâ Irides florent genâ,  
 Et tam modestè subrubent;  
 Ut ipse florem panè credatur Pudor  
 Propriâ animasse purpurâ.  
 Nec falsa terris nascitur Thaumantias  
 Minusque diverso caput  
 Distinguit igne: hinc æmulas astris rosas  
 Effingit; illinc lilia.  
 Hinc tristiozem fuscatur inter purpuram;  
 Hinc latioremuricem,  
 Inexplicatim pensiles tornat Scyphos,  
 Et picta Floræ pocula.  
 Illinc minore flore Narcissus nitet,  
 Canoque pallefcit gelu.  
 Quem si loquaris, suscitata flebili  
 Suspirat Echo murmure.  
 Adhucque mediâ voce Narcissum vocat,  
 Suasque deplorat specus.  
 At nec sub uno flore Narcissus latet,  
 Nec crine eodem fluctuat.  
 Illic fideli purpuram mendacio  
 Mentitur, & fingit rosas.  
 Illinc pudico subrubentes murice  
 Vivas odoris pixides  
 Suspenderit; inde luteas refert notas,  
 Floræque tintinnabula.  
 Hinc ditiori pingit auro pendulam  
 Floris tenelli bracteam.  
 Ac distributis in modum stellæ comis,  
 Flavum rotundat verticem.  
 Illinc cruentum mentiente sericum  
 Nutat labatque coccingo:



Aut nigricante buxum ferrugine  
 Senfim colorem diluit.  
 En rursus idem in aureis flavet genis,  
 Auroque ridet duplici  
 Argenteoque lacte conspersum caput  
 Virente concludit mitrâ:  
 Et quâ supremi verticis surgit coma,  
 Raro rubescit sanguine!  
 Unum quis unquam crederet florem unico  
 Vernare dictum nomine.  
 Sed quâ explicatæ porriguntur arbores,  
 Parvôsque despectant rubos.  
 Quæ lautiore Pyramis vernat comâ,  
 Aut vere majori viret?  
 Hinc viva Laurus Daphnidem celat suam,  
 Phæbumque non vetat procum:  
 Illinc superbum floreâ turri caput  
 Procera pomus erigit,  
 Et sub globosâ frondium testudine  
 Ætiva nutrit frigora:  
 Pyrusque celsis grandè testâ frondibus  
 Vastos relaxat fornices.  
 Trophæa terræ crederes victricibus  
 Intrare nubes infulis.  
 Et ne supino diceret quisquam DEUM  
 Isthæc patrasse brachio.  
 Quotcunque cerno folia, quotvè flosculos  
 Crebris notatos lineis.  
 Tot credo ductas sedulæ limas manus  
 Laboriosæque indices  
 Dextræ lituras: nam quis exquisitiùs  
 Vel scripta limavit sua  
 Vel scripsit unquam, aut paginas severius  
 Censore correxit stylo?  
 Quis te parentem nesciat florum DEUS?  
 Quis te marito nesciat?  
 Herbas serenis esse vestitas togis,  
 Rudesque depingi areas?

Tu molle pandos circumasti fosculos;  
 Tu cana tornas lilia,  
 Cassisque prælidarios sentes rosis  
 Certo catenas foedere.  
 Tu delicatis contegis taperibus  
 Verni pavementum soli.  
 Tu temperatis imbribus florum sitim  
 Extinguis, & plantas rigas.  
 Ad te omnis hortus floreas tendit manus,  
 Et densa pandit brachia.  
 Tibi dissipatis supplicantes frondibus  
 Curvantur excelsæ arbores.  
 Et in rotundos distributus urceos  
 Omnis rubescit fosculus.  
 Sed en & ore, nescio quid, pallido  
 Tibi loquantur lilia;  
 Ipsique flores, nescio quid, pandulis  
 Mutire conantur labris!  
 Absiste nervis Phæbe, quin Patrem suum  
 Ipsi alloquantur fosculi,  
 Et Chloris ipsa florulentis vocibus  
 Parenti aduletur DEO.  
 At nos Polonis interim gestis manum,  
 Totumque lassimus diem:  
 Totus Polonis Regibus sudet stylus,  
 Totæ sacrentur feriæ.  
 O quæ serenum gemmei, Virgo & Parens,  
 Cæli pavementum premis,  
 Et excubantes siderum accendis rogos,  
 Robur Clienti suggere.



AD

## GRÉGORIUM BAXONUM

De extemporali Poësi iudicium.

## O D E LXXXII.

Quisquis jocosø percitus entheo  
 Extemporali ludere carmine  
 Præsùmit ; horrentesque nosci  
 Præcipiti vomit ore versus.

Ille aut magistræ laudis avarior  
 Formosa vulgi nomina deperit :  
 Aut sacra , Musarumque leges  
 Indocilis temerat Sacerdos.

Odit profanæ verba loquentiæ  
 Laboriosi culmen Apollinis.

Repentè nil pulchrum ; frequenti  
 Urfa suos polit ore fatus.

Sublime quidquid vult , solido fovet  
 Natura partu : sic virides diu

Crevère lauri ; crevit illa

Ætheræ cedrus æqua nubi.

At ulva , vel quod vilius aspici ,  
 Submissiori verrit humum comâ ,

Serpillum , inæqualesque lappæ ,

Exiguus viruère lustris.

Sic dum madenti rore pentior  
 Exsudat æther , innumeros parit

Nox una fungos ; sic minores

Spe citius vegetantur herbæ.

Repentè natum carmen in extimas

Vanescit auras. Frange volubiles ,

Baxone , nervos , curiosa

Pegaseo metra stringe frano.

Nam cui supremis Musa natat labris ,

Spumâque tinctam carmen , & obvio

Extrusum palato cespitanti  
 Accumulat nova damna lingua;  
 Præcogitato dulcius influit  
 Thalia versu : quod cita parturit  
 Prurigo, de sublimioris  
 Ingenii ruit arce carmen.  
 Abfiste plebes, me iuvat interim  
 Lassata crebro pagina vulnere.  
 Multisque tetrītus lituris,  
 Sollicito calamus cerebro.

## Meta Votorum.

## O D E LXXXIII.

**Q**uid profunt Parii pegmata marmoris,  
 Sublimisque domus; quam Phrygiis graves  
 Trabs innixa columnis,  
 Testo subter eburneo ?  
**Q**uid prodest pedibus vix patiens premi,  
 Stratum Tænantis marmoribus solum ?  
 Aut vivis pretiosa  
 Sapphiris laquearia ?  
**Q**uid prodest Tyrio lana satur mero,  
 Captivæque suis divitiæ seris ;  
 Et quodcumque stuporem  
 Vulgo conciliat decus ?  
 Nil me regna juvant; nil iterum canam;  
 Quanquam gemmifero sordidus alveo  
 Pactolusque, Tagusque  
 Et magni solium Jovis.  
 Nil me divitiæ, quas vomis aureo  
 Præceps Inde vado; nil iuvat aurifer  
 Toto Lydius auro,  
 Et ditis pretium Cypri.  
 Hæc poscant alii; me minor interim  
 Intonsâ retegat cespes arundine,  
 Plebejâque lucernâ  
 Virtutis dominæ manus.

Hanc



Hanc desiderijs ingemino meis,  
 Hanc nunquam tacitâ sollicito prece.  
 Illâ vota precesque  
 Ac suspiria compleo.

## ELOGIUM LYRICUM

Perillustri & Adm. Rev. Dn. Dn. Alberto Szerebryski Canon. Cracoviensi. Ob Sacellum S. Francisci Xaverii, Indiarum Apostoli, Cracoviæ, in Regia SS. Petri & Pauli Basilica egregiè exornatum.

## O D E LXXXIV.

Sunt quos petrosæ fragmina Lydiæ,  
 Et è Lycurgi montibus eruta  
 Silex, peregrinumque marmor,  
 Et Paris variata clarant  
 Trophæa crustis. Alter inania  
 Jam pænè tactis culmina nubibus  
 Immiscet; addendumque stellis  
 Tegmen agit; nimiasque cælo  
 Inducit ædes. Hic veteres solo  
 Exæquat arces, fanaque diruit;  
 Fumoque Majorum sacrata  
 Tecta novis onerat colossis.  
 Ehest ruinas condimus! obruunt  
 Ipsa eminentem marmora gloriam.  
 Casura molimur, gravesque  
 Magno emimus pretio timores.  
 Quidquid superbis addimus arcibus,  
 Terræ & sepulchro demimus. En gravi  
 Lassata fabrorum tumultu  
 Stare negat, titubatque tellus!

Et iusta cæli fulmina provocat  
 Sublime marmor, cur minitantium  
 Irasque Fatorumque rixas,  
 Magnificis alimus fodinis?  
 At dum insolentis lege superbix  
 Patrum vetustos corrigimus lares;  
 Jam pænè desacrata cælo  
 Templa labant: & anhela crebris  
 Delubra rimis. Jam propè pauperes  
 (Quanquam vetustæ cura tenet domus)  
 Ad altra migravère Divi:  
 Nam rudibus male nixa fulcris  
 Gemmas profanis ædibus invident,  
 Et obsoleto fana silentio  
 Divosque, Divorumque Nomen,  
 Et patrios tumulant Honores.  
 Sic & propinquæ regna Bohemiæ  
 Formidoloso Mars quatit impetu:  
 Ausosque ditius vel ipsis  
 Cælitibus habitare Reges  
 Neglecta sternant Numina. Sic tibi,  
 Defunçte tantis Panno periculis,  
 Antiqua divisère sceptrâ  
 Odrysiæ nova jura Lunæ.  
 O cui fideli Relligio manu  
 Sublime sacris Nomen Honoribus  
 Apravit; illustresque nosci  
 Emeritis Titulos trophæis,  
 Divine Mystes, cum radiantia  
**XAVERIANO** pegmata nomini  
 Educis & **SIGSMUNDIANOS**,  
 Ausoniâ tegis arte muros:  
 Tibi perenni marmore durior  
 Non pænitentis Fama caloribus  
 Assurgit: Arctoumaque culmen,  
 Et geminos tibi sacrat axes,  
 Et ipse quanquam thuricremò sibi  
 Stipata fumo sacra per exteras



Fulserè gentes, quà Goana  
 Memnonium rubet ora solem,  
 Quanquam trecentis pervigil ignibus  
 In Mexicanæ collibus India  
 Stet ara, Brasiliæque turres  
 Perpetuo famulentur auro:  
 Tibi Patronâ XAVERIUS manu  
 Denata rursùm sæcula prorogat;  
 Arasque dignatus Craceam  
 Ingreditur novus Hospes urbem,  
 Qua liberali prodigus entheo  
 Tuo beatæ munere dexteræ  
 Invitat ardor, & recoctum  
 Dædaleâ secat arte marmor:  
 Ac eruditâ calce nitentia  
 Suspendit alto Symbola fornice;  
 Auroque dispunctum lacunar,  
 Arte novos imitante flores.  
 Tibi Myrones, & pretium novi  
 Debent Apelles; quos propius sacris  
 Inducis Aris, annuenti  
 Cæla jubens placuisse Cælo.  
 Humana quidquid dextera condidit,  
 Humana sternit. Subruit æmulos  
 Natura conatus. In una  
 Cum Phrygibus jacuere tumba  
 Superba quondam Pergama; nunc cinis,  
 Et incolentum rudera inurium.  
 Quò vasta Carthago? quò avaro  
 Ære graves Amathuntis arces?  
 Et illa quondam Roma, nimis suæ  
 Oblita Romæ! surgit & occidit;  
 Surgetque, & occidetque rursus  
 Divitibus tumidum ruinis  
 Inflatus orbis. Nulla sibi satis  
 Constabit Ætas. Nulla diu sui  
 Secura moies. Multa magnas  
 Hora tulit; rapit una Turres.

Tu certus ævi sæcula grandibus  
 Frenas lupatis: Tu fugientia  
 Momenta, pernicesque Lunas,  
 Et refugos super orbe soles;  
 Ac larga pennæ lustra tenacibus  
 Arctas catenis. Te superûm favor,  
 Et aucta SEREBRYSCIANIS  
 Cælituum monumenta RIVIS  
 Perennioris non dubium spei  
 Sanxère Civem. Tu minitantium  
 Compescis annorum furores,  
 Ac vetulæ cariem Senectæ,  
 Et excitatos divite parietes  
 Abscondis auro. Jamque volubilis  
 Secura Fortunæ serenas  
 Marmora perpoliére venas:  
 Ipsisque sese sternere calcibus  
 Gratantur ultrò. jam Patrias Tibi  
 Hinc inde suspendère Ceras,  
 Quà TRIPLICI madet AMNE saxum:  
 Triplexque Ganges Stemmata de Tuo,  
 Tagusque triplex volvitur: & simul  
 Hermique Pactolique dites  
 Diluvio locupletiore  
 Inaurat undas. Sic memori Tuum  
 Æternitatis Flumen in æquore  
 Volvetur, æternique sacros  
 Eridani cumulabit amnes.



PRO  
EODEM PER ILLUSTRIS

ET

Admodum Rev. Dno  
Ad S. Franciscum Xaverium  
VOTUM.

O D E LXXXV.

**D**IVE cui fulvo tumidus metallo  
Gemmae inter Brasidium saburras  
Supplicat Ganges: rubeique largus  
Fluminis Indus.

Quem Molucani didicere tractus  
Aureâ Numen sonuisse linguâ?  
Et pedum Japon minor; & sequestri  
Regia Bungi,

Huc ades quâ te **SEREBRYSCIANUM,**  
Arte nativas imitante gemmas,  
Marmor invitat; vigilesque sacro  
Igne lucernæ.

Quâ Timantæ genio Palæstræ  
Viva stellatus rotat astra fornix;  
Nec spei cassum laquear superbo  
Invidet auro.

Quâ Tunetanis animatus herbis  
In tuos gestit color ire vultus;  
Et suum fronti decus, æmulamque in-  
fundere mentem.

Hinc & hinc fixum geminis laborat  
Postibus marmor: minus eruditæ  
Cælia Naturæ; pretioque doctus  
Certat Apelles.

Nec

Nec tamen cedit pretio ; nec arti  
 Ille , qui prompto tibi servit are :  
 Et suum vincit propè munus ipse  
 Muneris auctor.

Vincit impensas Animus , nec ulla  
 Lucra collatos pariant favores.  
 Nec latex fontem superat ; nec haustum  
 Flumina Pontum.

Ergo bellacis columen Navarrae ,  
 Quà tui certus SEREBRYSCIANI  
 Pectoris candor vocat , expeditos  
 Dirige passus.

Ille seu multæ miserùm catervæ  
 Nesciam stringi , timidamque nosci  
 Porrigit dextram ; querulosque numinis  
 Ditat egentes.

Sive dotandis opulenta Divis  
 Dona dispensat : benè contumaci  
 Consultit Fato , redimitque magna  
 Tempora Famæ.

Quos fatigatæ peperère Lunæ ,  
 Una collectos rapit hora census.  
 Volvitur sensim , teretisque gyrat  
 Copia nummi.

Pauper est , qui plus cupit obseratis  
 Incubans gazis. sua dona parcus  
 Qui premit , perdit ; perimens sepultæ  
 Semina laudis.

Ille qui sparso pretiosus auro  
 Pauperes dicit superos ; suasque  
 Elocans gazas meliorem Numen  
 Fænore stringit.

Ille Fortunæ , dubiæque gaudet  
 Certior fortis , cui grata justum  
 Astra vectigal , solidumque pendent  
 Fata tributum.

Talis erectis , tibi Dive , votis  
 Se cliens sacrat ; Patriumque largo



FLUMEN electro; nec avara clausæ  
Scrinia gazæ.

Quæ SIGISMUNDI tholus, hospitalis  
Ad latus PETRI, tibi dedicatam  
Porticum pandit, facilemque cerni  
Erigit arcum.

Si tibi præni studio clientis  
Regius multo lapis ardet auro:  
Si Craci culmen placet, & propinquus  
Petra Veveli;

Sic ei magnæ per acuta Famæ  
Limpido TRIPLEX fluat AMNIS auro;  
Semper illimis liquidoque semper  
Dives obryzo.

Sic procellosi vacuus duelli  
Vitreo totos bibat ore cælos,  
Donec immensum subeat refuli  
Numinis Æquor.

## CARMEN SECVLARE, DEI MATRI VIRGINI

Incunte anno à nata in terris Sapia  
M DC XLIII.

E VOTO METAPHYSICORVM

Ad metas humanæ Sapientiæ consistentium,

IN COLLEGIO KARNKOVIANO  
SOCIETATIS JESU.

In gratiam Condiscipulorum  
DECANTATVM.

**N**Ec me Latinis æmula vatibus  
Exemit ætas. Tendite Gratia

K

Lyras-

Lyrasque chordasque, & disertis  
 Mane novum recreate plectris.  
 Jam nata rorem Lux sitientibus  
 Propinat agris: surgite Præfides  
 Deæ; *Mariamumque vasem*  
 Castalio redimite ferto.  
 Non fata Trojæ; non Agamemnonis  
 Multo redemptam sanguine lauream  
 Cariemus, aut sparsas Achillis  
 Busta super tumulosque palmas.  
 Tibi, diei *Prodroma*, Thracio  
 Interrogatam pectine barbitoni  
 Tentamus, attractosque nervos  
 Ad tacitam moderamur aurem.  
 Tuo; recentis tæritia sæculi;  
 Et nexa densis orbita mensibus;  
 Expiret in sinu: renatæ  
 Hinc iterum remeent Kalendæ.  
 Tibi propinquis sanguinibus novum  
 Signamus Annum; cum sibi Vagiens  
 Infonte sacratum criore  
*Nomen* emit titulosque VERBUM.  
 Tibi dicatum, Diæ Parens, AVE  
 Quæ narrat horas machina quolibet  
 Persolvat ictu; & tær monente  
 Quæque dies dabit ære SALVE.  
 Utcunque casti nomine Sideris  
 Expergefactæ prævia Gratia  
 AURORA diceris modesto  
 Castius erubuisse vultu.  
 Non te Phætetes; non nimio dies  
 Extinguit igni. Tu mihi blandius,  
 O Virgo, sub meridianis  
 Mane refers; Cynosura, flammis.  
 Quin & supernæ maxima GRATIÆ  
 Dicere MATER; cui vigiles sacrum  
 Caput coronavere stellæ;  
 Cui famulum sociata cælum



In circularem sidera taniam  
 Stellis Planetas dissociantibus  
 Coëgit, & bis sex fluentem  
 Sideribus cohibere crinem  
 Affectat ultrò: cui adamantina  
 Pallent supinæ cornua Cynthiæ:  
 Et ipsa nequidquam perosa  
 Exiniam capitis tiaram,  
 Tibi decentes nectere calceos,  
 Et virginali non humilem pedi  
 Aptare gratatur cothurnum,  
 Aquæ tuis melius serenum  
 Haussisse plantis. Quid memorem simul  
 Tinctas pudici lumine Phosphori  
 Fulgere malas; ac honestis  
 Tempora subrubuisse flammis?  
 Quid ad fluentis syrmatata pallii,  
 Si quando, Mater, tendis in aureum  
 Cæli pavimentum, trecentas  
 Sub pedibus vigilare stellas?  
 Quas ludibundi dextera parvuli  
 Hinc inde flexi straminis in modum  
 Prehensat; & ridente vultu  
 Innocuos tibi monstrat ignes.  
 Utcunque nobis diceris Aurea,  
 Quam sumptuosis marmora colligant  
 Hinc inde gemmis, ô trecentis  
 Digna *Domus* supereminere  
 MARIA pinnis! seu tibi Cedrinæ  
 Auro gravatos tollere fornices  
 Certant columnæ; seu per amplas  
 Gemma frequens tibi ridet ædes.  
 O me beatis postibus additum  
 Adscribe vatem! me, **DOMUS AUREA,**  
 Stellasque nolentemque cælos,  
 Hospitio meliore virgo  
 Dignare Mater! si tamen ardua  
 Non pœnitendæ **CASTRA** potentiz

Metaris, & rursus ORDINATA  
 Belligeris acies sub alis  
 Dicere? lectum me tibi militem  
 Adscisce, Virgo; me tua potinus  
 Sub signa, sacratumque Martis  
 Auspiciis, rigidasque rursus  
 Adscribe turmas? non ego proprii  
 Parcus cruoris, Nestorios finam  
 Impunè grassari; aut caninos  
 Sacrilegi fremitus Arii.  
 Certus triumphis, certus in obvia  
 Calvinianæ monstra proterviæ  
 Armabor, instantesque rumpam  
 Virgineis acies trophæis.  
 Tum post peracti classica prælii,  
 Si fors Cadanis PALMA vocaberis  
 Florens corymbis; ipsa nostrum  
 Non humili caput, ipsa vere  
 Umbrabis olim; non ego laurea  
 Nunquam vetustæ brachia Daphnidis;  
 Frondesque Dodonæ; aut dicatum  
 Herculeo folium labori  
 Desiderarim, si mihi vel Rosa,  
 Vel innocentis florida LILII  
 Hyems triumphales decoro  
 Flore velis redimire crines.  
 Quin nec molestis horreo tempora  
 Sepire spinis, si mihi Liliis  
 Exinde surges, delicatis  
 Immeritam religare frontem  
 Dignata fertis. O radiantium  
 Exuberanti lumine vivida  
 FENESTRA caloribus, innocenti  
 Digna magis radiare vitro.  
 O PORTA Cæli! gemmea siderum  
 O porta virgo! nobile Regii  
 ALTARE cultus, quod trecentis  
 Gestit Amor cumulare votis.



Quocunque tandem nomine fulseris,  
 Tuo quotannis lumine tetricas  
 Solabor horas, seu resurgit,  
 Seu vetulo labat ore Titan.

Si te Phœnetem dixeris: illico  
 A tam sacratis torreo ignibus.

Sed dicta rursus diffuenti  
 Flas tepidos Cynosura ventos:

Quis ille vero Fons vitreis vocat  
 Ad se labellis? quæ salientium

Prœcella lympharum bibaces  
 Explicuit sine labe fluctus?

Heu quanta casti me fitis occupat

O Virgo, fontis! da cupido sacrum

Hausisse nectar, sine tu FONDS,

Sive suâ PUTEUS vocaris

Illimis undâ: non ego garrula

Apollinaris flumina Pegasi

Vovebo, si vivacis undæ

Virgineos referabis amnes.

At nunc, tuorum si qua clientium

Te cura tangit; pulchra volucris

Protende tantisper Favonis

Lora, super bijugesque pernix

Ascende ventos: te juvenum frequens

Suppirat ordo; te vigilantibus

Aræ lucernis, supplicisque

Ingeminat pia flamma ceræ.

Tibi, *Modorum* gloria, Lesbios

Gratante plectro colligimus modos;

O Mater, Æternum administro

Digna Modo genuisse VERBUM.

Hic, quâ mitrato vertice celsior

Tibi supinis cornibus annuit

AGNUS, superstitesque nobis

Auspicio potiore Colchos,

Crispumque Phryxo non minor æmulo

Suspendit aurum: quâ tibi subditæ

Lassantur arx : & digniora  
 Herculeo monumenta furto.  
 Qua grata doctæ pænia Palladis  
 KARNKOVIANIS manibus assidet,  
 Udxque deplorant Camænxæ  
 Præsulei cineres sepulchri:  
 Quæ præfidentis Arx *Sapientix*  
 Inter minores summa *Scientias*  
 Ediçta dispensans, Lecheam  
 Non dubio ciet ore pubem.  
 Quam ponè flexo cernua vertice  
*Natura* adorat ; cui capitis minor  
 Se spontè submittit *Mathesis*,  
 Et *Logica* genius Minervæ.  
 Huc, increatæ quæ SAPIENTIÆ  
 Mater vocaris, virgineos age  
 Molire currus ; huc vel ipsa  
 Te queruli vehat aura voti.

QUIES POST LECTIONEM  
THEOLOGICAM.

AD PEDES

VIRGINIS MATRIS  
PUERUM JESUM  
AMPLEXANTIS.

O D E LXXXVII.

**F**essus Theologi disidiis fori,  
 Hic ad virgineos me jacio pedes ;  
 Mitis somne veni, clausaque languidis  
 Adhuc lumina palpebris.



Alternâ vegetum stat requie caput :  
 Et se interposito mens fovet otio.  
 Nil durat nimium. Tensâ diu fides  
 Plectrum deserit & manum.

O qui Liligero virginis in sinu  
 Blandum pupe cubas, tu mihi languida  
 (Virgam Mercurii temno) oculi vitra  
 Dulci sparge papavere.

Junonis dubio somniet in sinu,  
 Quem Fortuna juvat. dum mihi tutior  
 Affusum dominos virginis ad pedes  
 Somnum conciliet quies.

AD

REMIANUM FESTIUM.

De suis scriptis, eorumque publi-  
 candorum morâ.

O D E LXXXVIII.

Cur diu tantis, Remiane, curis  
 Opprimor, quaris : quoties minores  
 Ingenii partus minus expetitæ  
 Commodo luci;

Sepe *Cunctator*, nimiumque tardus  
 Audio vates : mihi sæpe dicis  
 Vera *TESTUDO* digitos, & ambas  
 Possidet ulnas.

At nec à tantis monitus querelis  
 Occupo tardas magis ipse pennas ;  
 Et citum nasci gravibus calorem  
 Tardo lituris.

Ante maturis mea charta canis,  
 Ante deoptano adolescat ævo ;

K. 4

Ante

Ante versetur, crucitata donec  
 Cura senescat.  
 Non ferunt longam properata lucem.  
 Temperat nostrum Maro dux calorem,  
 Perque bisfenos vigilata quondam  
 Thebais annos.

Fædum in Parnasso monstrum,  
 turpis inter Poëtas invidia.

O D E LXXXIX.

**O** Nata pulchras inter adoras,  
 Latùm tuentis prodigialior  
 Propago famæ ! o in decoris  
 Progenies malè nata cunis !  
**O** laureorum blatta cacuminum  
 Profana , fæti non populariter  
 Proles Honesti ! dicta quondam &  
 In mediis habitasse cælis.  
 Enate multis Livor in ædibus,  
 Adulte multis. te sibi disparem  
 Inter Planetares ruinas  
 Dius Honor genuisse partum  
 Narratur olim. Te per & inclytas,  
 Et si impotentes stare pedes, manus  
 Juvaret heroum tiaras,  
 Et solida monumenta famæ  
 Impunè reptasse ; ac mediis super  
 Mavortiorum culminibus Ducum  
 Hæfisse passim ; per suasque  
 Se se iterum recreasse mortes.  
 Quis ille ? verò ( pro superùm fidem ! )  
 Quis ille tandem per medias tui,  
 Apollo , Parnassi nivales  
 Se genius graviore passim

Ince-



Incestat aurá. quæ furia impio  
 In eruditas serpere lauras  
 Luctatur ausu? quæ sacratas  
 Aonidum populata frondes  
 Se pestis infert? quam macies propè,  
 Pallorque fædis pingitur in genis,  
 Horrorque, qui frontis serenos  
 Inciliis sepelivit ignes?  
 An & scelestum, sit licet innuba,  
 Thalia partum jure stupentibus  
 Effudit astris? proh vetustæ  
 Excidium, interitusque famæ!  
 Sic & sacrati culmen Apollinis  
 Infame passim corripuit nefas.  
 Ipsosque jam passim Poëtas  
 Livor edit spoliūque laudis.  
 Ille excubanti Dædalus impete,  
 Perjura nostris laudibus impulit  
 Do labra; quæis parvas videri,  
 Pergit adhuc tenuare laudes.  
 Vel si supremi gloria nominis  
 Nolit dolari, protinus horridam  
 Se volvit in nubem, & latentes  
 In nebulis tetricoque fumo  
 Celare laudes pergit, & impias  
 Inhalat umbras: hinc meritis frequens  
 Se vesper infudit trophæis,  
 Hinc vetulæ periëre laudes.  
 At, si sacrati restat adhuc amor  
 Collis Poëtæ, si vice consonâ  
 Æterna magnorum vocamur  
 Posteritas sobolesque Divum:  
 Si dius omnes altius impulit  
 Apollo vates; pellite perfidam  
 E valle Permessi, aque castis  
 Invidiam prohibete Musis.

AD

## FELICEM GEORGIUM.

Christophori Baldovini Oſſoliniſki Pala-  
tinidæ Sandomiriensis, Stobnicensis  
Ropezycensis &c. Capitanci filium.

## O D E X C.

Sunt quos patricii ſtemmata ſanguinis,  
Et conſanguineæ ſymbola gloriæ  
Ignavos faciunt: qui patrium decus  
Cunis intumulant ſuis,

At tu Sarmatici fax nova climatis,  
Fax Oſſoliniis addita ſaciſibus,  
Nunquam propoſiti nominis immemor  
Magnis paſſibus emica.

Seu te belligeræ circulus orbitæ,  
Inter Sarmatici fulmina prælii,  
Ac immerſa ſuis ſpicula cædibus  
Et miſtos gladiis globos.

Sêu Bellona truci percita claſſico  
In conferta ſuæ præta Podoliæ  
Invitat, rigido fortis acinace  
Latas ibis in areas.

Et de Tartaricis vulneribus tuum  
Implebis gemino nomen anhelitu:  
Nec parcus proprii ſanguinis hoſticum  
Totis viribus hauries,

FELICEMQUE tibi te fore dixeris.  
Si fors pro patriæ ſinibus arduum  
Fati amplexus iter magnanimo frequens  
Vulnus nomine ſarcies.

Hic



Hic post emeriti classica praelii,  
 Ac absterſa levi vulnera ſpongiæ,  
 Infundes clypeis vel tibi proximo  
 Feſſum corpus in aggere.

Post haustasque gravi de galea nives,  
 Evictamque famem, latior ardua  
 Ad ſuprema novæ culmina gloriæ  
 Fauſtis ibis Eteſiis.

Quod ſi paciſeræ Palladis atria  
 Marti prætulero: protinus huc, ubi  
 Sudor Pieriis præfluit arcibus,  
 Pronos curre per aggeres.

Hic gentilitiæ prodigus ASCIÆ  
 Cæſas de viridi culmine laureas  
 Doctâ fronte ferens, ſertaque fortibus  
 Immiſcebis adoreis.

Et junctas patriis Faſcibus Aſcias  
 Doctâ lege jugans conſiliis Patrem  
 Effinges, patriæ lapſaque propriq̃  
 Siſtes ſceptra periculo.

Tunc conferta ſuis roſtra curulibus  
 Diſtractumque gravi diſſidio forum  
 Leni voce tenens Herculis aurea  
 Stringes pectora compede.

Vel ſi fædifragi Cynthia Concani  
 Armatos Geticis enſibus Ædonas  
 In nos impulerit; prælia, & aſperæ  
 Suadebis juga gloriæ.

Tunc & non vacuo nominis omniæ  
 FELIX à Lechicâ gente vocaberis,  
 Et patrum decus, non popularia  
 Doctus vincere nomina

At nunc cum teneræ vincula Faſciæ  
 Plexas non humili ſtamine dexteras  
 Infanti cohibent, creſce volentibus  
 Felix progenies Diis.

Creſce

Cresce ò magnanimo dignus Avo Nepos,  
 Primis ingenuam fletibus indolem  
 Confessusque Patrem; cresce novas tuo  
 Spes cum nomine nutriens.

In eos qui exoticis ac inusitatis  
 nominibus delectantur.

O D E X C I.

**A**T ò Polonæ quisquis amicior  
 Virtutis hæres, projice barbaros  
 Ritus, peregrinumque nomen  
 A Lechicis prohibeto fastis.  
 Nam cur Latino Scipiada minor  
 Victoriosæ symbola gloria  
 Innadit, & sublimiores  
 Romulei titulos Quirini;  
 Qui militaris parciore indolis  
 Paterna quondam tela Decembribus  
 Exussit in focis, & altas  
 In stimulos humilemque stivam  
 Coëgit hastas? dum tenui manu  
 Sulcans paterni jugera prædii  
 Fodit reluctantem juvenicum,  
 Et patriis secat arva pilis.  
 Ac pro revicti verticibus Getæ,  
 Aut Tauricani milite Conçani,  
 Prosternit imbelles aristas;  
 Hæcque sua tegit arva strage.  
 Alter furenti percitus impetu  
 Iræque largus, mitibus asperos  
 Confundit Augustis Nerones,  
 Et veterem crepat ore Numam.  
 An & ferarum (prò Patriæ pudor!)  
 Indigna nobis nomina fingimus,  
 Pardisque commissos Leones  
 Ingenio exprimimusque factis?

At



At ô Polonæ si quis amor rei,  
 Ignota nobis nomina patriis  
 Delete de fastis, Quirites,  
 Et vetêres renovate ritus.  
 Hic acer ensis, ac gladii, arduis  
**MIECISLAORUM** nomina dexteris  
 Interpretetur, & redemptam  
 Belligero paret ense famam.  
 Alter, regendæ laudis idoneus,  
 Potensque famæ, moribus exprimat  
 Nomen **VLADISLAI**, sciatque  
 Certa suæ dare jura laudi.  
 Hic non inani nomine sedulus  
**PREMISLAORUM** se genio ferat  
 Illustrem; & inclinata quondam  
 Consiliis animisque sistat  
 In se ruentis culmina patriæ  
 Infractus Atlas. Hic **LECHUS** audiat,  
 Hic **LESCO**, nobilisque **PIASTUS**;  
 Hic Lechico **ZEMOMISLUS** olim  
 Illustris auro. Si veterum tamen,  
 Quos densiori fusa volumine  
 Caligo, gentilsque ritus  
 Immemori sepelivit urnâ,  
 Pudet Parentum: sunt alii tibi,  
 Polone, fasti; & vel Latios super  
 Inscripta colles, vel Pelasgis  
 Nomina nobilitata faxis.  
 Quæ vel professâ conspicuus fide,  
 Vincens aperto lilia pectore  
 Candor fatetur; vel refusus  
 Purpureo cruor ambit ostro.  
 Sunt sacra quondam, sunt merito **Lechi**  
 Recepta cælo nomina; sunt quibus  
 Servata libertas, & auro, &  
 Supplicibus vigiles lucernis  
 Accendit aras; hinc tibi faustius,  
 Olim futuris danda nepotibus,

Polone, non vanum futuri  
 Nomina suppeditabit omen.  
 Hinc nata proles, non vacuum sui  
 STANISLAORUM nomen; & intima  
 Bene apprecantis ominetur  
 Vota spei, similesque Patrum  
 Promittit ausus; queis ubi grandior  
 Ætas virilem fuderit aleam,  
 Patrisque patriæque certâ  
 Laude decus, pretium famæ  
 Non otiosis asserat ictibus,  
 Invictus hæres. hinc alius tibi  
 Assurgat ALBERTUS, Polonæ  
 Gentis amor, patriæque florem  
 Vel FLORIANI nomine præferat;  
 Vel indecõri fæderis otia  
 Rumpenda promittat, vocandus  
 Non humili CASIMIRUS æstro.

SUMPTUOSUS  
 MODERNI SÆCULI  
 MENSARUM  
 AC  
 CONVIVIORUM  
 APPARATUS.

ODE XCII.

**G**ulæ magistrum persequar, Musæ, scelus.  
 Ultore Vates carmine.  
 Ventrinè tantum vivimus? Mystæ gulæ,  
 Voracitatis Præsules:

Sordens



Sordent sub axe patrio natae dapes ;  
 Avita sordent fercula.  
 Et ni macello farciatur Indico,  
 Fames superba murmurat.  
 Cupediarum quidquid aut Phasis fovet,  
 Aut dives Oriens educat,  
 Totis ematur censibus : nec annuo  
 Crumena parcat censui.  
 Multisque patinas aestimatas millibus  
 Dives culina praebeat.  
 Et tota paucis laucibus patrimonia  
 Infanus impendat nepos.  
 Centum coquorum dapniles exercitus  
 Uni Dynastae militant.  
 Strepunt culinæ ; fumus obfuscatur diem.  
 Aetnae favillas crederes :  
 Trojamque rursus ; & suis captum dolis  
 Fumare rursus Ilium.  
 Immugientum hinc fervet ollarum coloris,  
 Illinc ahenorum agmina.  
 Hastata veruum stridet hinc & hinc phalanx,  
 Mille legiones lancium.  
 Pippire volucres ; garrulosque posthumo  
 Stridere gutture anseres,  
 Et quidquid igne pinfitur Vulcania  
 De plebe , censes queri.  
 In quaestionem turdus ; & perdix gemit,  
 Raptumque Phœnicopteri  
 Quidquid savori servit. acta in equuleum  
 Omnis ferarum copia.  
 In jus vocati taurus ; & lepus pyræ  
 Adjudicantur ignæ.  
 Alter Prometheus cervus explodit jecur,  
 Exenterantur bubali  
 Tortore ferro. dama carnifice rotâ  
 Torretur Ixion merus.  
 In innocentes sæviunt cultri feras,  
 Fera necantur & feris.

Apros molossi lancinant ; aves , aves  
 Gulæ voracis victimas ;  
 Et ni suorum purpuretur sanguine ,  
 Hero ferina non sapit.  
 Mox pharmacorum prodigâ fluens manu  
 Exoticorum copia  
 Inundat ollas : advenæ Tmolo croci  
 Pretiosâ inaurant flumina.  
 Armantur apri pipere : amaris dulciâ ,  
 Ludunt amara dulcibus.  
 Ac evoluti cinnamorum cortices  
 Adusque pulverum nihil ,  
 Molles arenâ divite inscribunt notas ;  
 Limbosque circumsepunt.  
 Hinc Canarino saccarum ridet gelu ,  
 Extrema rident lancium ,  
 Nivesque circum , circum & hyemes albicant  
 Purosque claudunt margines :  
 Post fata rursus vitreum natat pecus  
 Mellita subter flumina.  
 Anserque pigri Nerei quondam accola  
 Inter sapes fluctuat.  
 Domator alter collis ad morem tumet ,  
 Premente pomorum strue.  
 Tum tortuosa sumptuoso cochlea  
 Inviscerantur hospite ;  
 Et quidquid infami Ostreorum gurgite  
 Lucrina piscatur Thetys.  
 En pavo vitæ medius à morte explicat  
 Stellata caudæ lumina.  
 Et centum oculois hospites signat comis ,  
 Pupilla pennarum aurea.  
 At inde saturam provocat famem suis  
 Gallina cincta prolibus.  
 Gallusque semivir , vel uvens Ardea  
 Coo petita litore.  
 Anserque Thuscus , & cothurnix Indicæ  
 Raptura palmam Phasidi.

Con-

LTA  
 Confili  
 Gai  
 Sentin  
 At un  
 Ar  
 Non bo  
 non pro  
 Falsobol  
 Metas p  
 Lances  
 Turcia  
 Trabel  
 Suspirio  
 Anhe  
 Farjur  
 Ad u  
 Tuentur  
 Pac  
 Oculis  
 Ocul  
 Siltunur  
 Et nul  
 Senexque  
 Crebr  
 Quo cum  
 Redu  
 Et cras  
 Hester  
 Oppugnat  
 Ac vie  
 E du mic  
 Longo  
 Præter  
 Lesque  
 Rija  
 Tenu



Confusa centum ferculis (Ollam vocant  
 Gulæ sacrifæ putridam)  
 Sentina planè nausæ, & famis scætet  
 Infame diverforium.  
 At cum supinas vestit mensas labor  
 Discriminatis orbibus,  
 Mox resluentum, & diffuentum plurima  
 Nant bajulorum examina.  
 Dapum procella, nimbus & mappas procul  
 Fastidiosus opprimit.  
 Mensas paropsis subditas latè premit;  
 Lances superstant lancibus.  
 Turriga crebris mappa consurgit jugis,  
 Trabesque patinis territat.  
 Suspiriosus ingemit venter, satis  
 Anhela clamant viscera:  
 Farcitur usque, sed tamen satur fames,  
 Ad usque fundum nausæ.  
 Tuentur ora, nausæat ventris tumor;  
 Pascuntur epulis lumina.  
 Oculisque dentes invident; & dentibus  
 Oculi voraces exprobrant.  
 Sistuntur argento interim graves scyphi,  
 Et militares amphoræ.  
 Senexque Bacchus, seculare dolium  
 Crebro reliccans congio  
 Quo cum recedens perpluit se Phosphorus,  
 Redux stupescit Hesperus.  
 Et cras relinquens Indicum Phæbus torum  
 Hæsterna ridet pocula.  
 Oppugnat alter alterum scyphus scyphum,  
 Ac vitra respondent vitris.  
 Et cœu micantem cæteræ Phæbum faces  
 Longo sequuntur ordine;  
 Prætoræ vitra cantharo mensas premunt.  
 Lateque mappas obfident.  
 Ripis stupescit aureis se se merum,  
 Tanto superbum margine,

Compendiosus unicâ ridet Lyæus  
 Se se intueri vineâ.  
 Jam tunc Falerni non eget solis Pharo,  
 Calena temnit jugera.  
 Jam tunc Faliscos deserit libens cados,  
 Rubrasque Cypri vineas.  
 Coumque temnit; temnit & Tmoli caput  
 Flavasque Cretæ glareas.  
 Glebas pinguis Massici mittit manu,  
 Consortiumque Synnadæ  
 Vitis superbus; in gelu gemmæ cævo  
 Purisque stagnat balneis.  
 Centum salutes quisque præbicit; bibit  
 Quisquam salutesque totidem.  
 An mersa tantum cantharis natat salus  
 Siccos perosa margines?  
 Sapit nec unquam ni fit ampliâ prodigo  
 Condita vino gratia?  
 Jam naufragatur animus; & plantæ labant,  
 Diluta længuent viscera.  
 Stupet cerebrum; sed caput ducit choros.  
 Vinum loquuntur lumina,  
 Vinoque stillant; tota mens vino madet,  
 Caduca fallit tibiâ.  
 Deliberanti stet ne, num cadat, pedi  
 Incurva cervix annuit.  
 Reciprocantes & dubii planum pedes  
 Super pavimentum narant.  
 Errat loquela, lingua titubat, nant manus;  
 Eclipticique stant dies.  
 Tum sinistra turpi classicum canunt joco,  
 Fædosque provocant sales:  
 Et inverecundis socia verbis comes  
 Miscetur impudentia.  
 Rauca peritum tibiæ citant pedem  
 Gyrare molles circulos.  
 Itur per ulnas, manibus adnæxæ manus;  
 Fulsam ingemit cænaculum.

LYRICUM  
 Methæis ipse del...  
 Sphæricis ang...  
 At ô Averna...  
 Vitis...  
 Abilit...  
 Si...  
 Mar...  
 ô dara Bellom...  
 Hæ...  
 Et...  
 Alia...  
 At...  
 per Gelonos...  
 Tepente...  
 sub hospitali...  
 Favente...  
 Elusa...  
 Et...  
 Haustusque...  
 Illimis...  
 Scitum fugavit...  
 Simulque...  
 Fome ex eodem...  
 Commur...  
 Viridisque...  
 Herbaque...  
 At lætus aron...  
 Quæ...  
 Ephippique...  
 Mordet...  
 Spectante celo...  
 Propinat...  
 Mox cum severa...  
 Tonante...  
 Totus...  
 Scilicet...  
 Alter...  
 Babus...



Mathesis ipsa, sed carens puncto, rotas  
 Sphærasque pangit, crederes.  
 At ô Avorum quisquis immunes geris  
 Vultus decusque Patrium;  
 Absiste circo: dedecent chori viros,  
 Et fæminales circuli.  
 Martis cruentus circus invitat viros.  
 Ac dura Bellonæ orbita.  
 Hic hic parentem masculus quondam chalybs,  
 Hic entheata pectora,  
 Addicta famæ negligunt ipsam famem,  
 Ac erudita fercula.  
 Sed per Gelonos postquam arietatum est choros,  
 Tepente Thracum sanguine;  
 Sub hospitali populo, vel esculi  
 Favente textilis domo,  
 Elusa patinis vilibus cessit fames,  
 Et rusticano prandio;  
 Haustusque galeâ præfluentis rivuli  
 Illimis ac purus latex  
 Sitim fugavit; dum cavâ miles manu,  
 Simulque potat cornipes  
 Fonte ex eodem: Utrique communis scyphus,  
 Commune currit poculum.  
 Viridesque mensas sutilis cespes soli,  
 Herbæque mappas exhibent.  
 At lætus atrum hâc gerit panem manu,  
 Quâ tela miles gesserat;  
 Ehippique membra commendans rudis  
 Mordet polentæ segmina.  
 Spectante cælo, sole ridente, & volâ  
 Propinat alter alteri.  
 Mox cum severas pugna sufflari tubas  
 Tonante iussit classico;  
 Totus choreis aptior manui manum  
 Scutisque scuta conferit.  
 Alter supino, dum capit fessus cibum,  
 Bœbus solutis, vomere,

Libuffa Regem dum sibi cælebs virum,  
 Equo subarrhat prædromo,  
 Regnum colonus rusticas inter dapes,  
 Pretiosa rifit fercula.

Illamque, quam nos mitibus pomis gulam  
 Mensâ secundâ ludimus,

Lusit coronâ, sponte dum fasces subit  
 Stiva, & lacerna purpuram.

I, perge, quisquis divitem nutris gulam.  
 Nec tale spera ferculum.

Nam si Neronis æmularis prandium,  
 Cœnam æmulabere Claudii.

